

NUNARSUAQ TAMAKKERLUGU ATUARNEQ 2019

# ATUA RAKET



COLOMBIALIARPOQ



Red Barnet



OXFAM IBIS



## ATUARAKET APP-ITUT

AtuaRaket aamma onlinemiippoq. Filminik, assinik, atuffassissutinik Colombialu pillugu linksinik itisiliinerusunik imaqqarpoq.

LæseRaketten App Storemit imaluunniit Google Playimit downloaderuk.

Imaluunniit LæseRaketten interaktiviusoq computerikkut Ipadikkulluunniit atoruk.

Tamaasa nassaaresinnaavatit uani:  
[www.heleverdeniskole.dk/app-2019](http://www.heleverdeniskole.dk/app-2019)

ATUAKKAP INUTTAA:

ATUAQATIGIIT:

# ATUA RAKET

Meeqqat tamarmik ilinniarnissamik piginnaatitaaffeqqarput. Oxfam IBIS Red Barnetilu nunarsuarmi meeqqat tamarmik atualernissaannik nunarsuarmioqatigiit anguniagaata nr. 4-p eqqutinnissaanut qulakkeerinninniarnermut suleqataapput. AtuaRaket atuarukku meeqqat tamarmik pitsaasumik ilinniagaqarnissamik piginnaatitaaffeqqarnerannut tunngasunik ukkaseqataatitsivutit.



Red Barnet



OXFAM IBIS



# ATUARAKET 2019



AtuaRaket 2019-imut tikilluaritsi / 4  
AtuaRaket Colombialiaqatigiuk / 6

## NUKARLIIT

Thaliana kuup sinaani najugaqarpoq / 8  
*Heidi Brehmimit*

Team S.C.O.R. / 20  
*Sandra Schwartzimit*



- Jordan 2018:  
Muna tupaallatsitaavoq / 32  
Murhaba Nidal / 33
- Colombia ilisimasaqarfigineruleruk / 34
- Mariap pisariaqartippaasi / 40
- Ima ikiuussinnaavusi sikunnallusilu / 42

## AKULLIIT

Jennifer paaavillu / 44  
*Heidi Brehmimit*

Ilikkagassat amerlaqaat / 50  
*Heidi Brehmimit*



Sissaq saligaatsuutiguk / 56  
*Daniel Zimakoffimit*

Lucia illumi parnaaqqasumi / 68  
*Stine Bangimit*

- Oxfam IBIS / 74
- Red Barnet / 76
- Alinea: Taamaammat uku atuassavatit ... / 78
- Nunarsuarmi meeqqat atuarlertissigit / 80
- Nunarsuarmioqatigiit anguniagaat piviusunngortissigit / 82
- Nunarsuarmioqatigiit Colombiamut anguniagaat / 83

## ANGAJULLIIT

Anaana sakkutuujunikuuvoq / 86  
*Stine Bangimit*


Yuseth mattussaaqqanikuuvoq / 92  
*Heidi Brehmimit*

Nipilersoqatigiit inupiluraqatigiilluunniit / 98  
*Heidi Brehmimit*

Sambiki Saru / 104  
*Kit A. Rasmussen*



# AtuaRaket 2019-imut tikilluaritsi



Ukioq manna AtuaRaket Colombialiarpoq, nunamut alianaatsorsuarmut, inoqajuitsoqarfia panertoq kiattullu orpippassuaqarfia naggorissoq. Colombiami innuttaasut ukiut 50-it sinnerlugit sakkortuumik imminnut sorsuussimapput. Inuppassuit toqupput qimaasorpasuaqarlunilu. Suli ullumikkut pinerluttuliornerit, inupiloqatigiinut ilaanerit nakuusernerillu atugaaqaat. Maannali eqqissinissamik suliniuteqartoqarnera siunissamik qaamanerumik neriuersitsivoq.

Colombiami innuttaasut atugaat eqqarsaatigalugit naligiinngiffiunerpaat ilagaat. Pisuut piitsullu naligiinngitsorujussuupput. Colombiami nunap inoqqaavisa nunap najukkamik piginissaa ilungersuutigisari-aqarpaat. Meeqqallu Amazonasermiut 5.klassip kingorna atuarnertik nangissagunikku illoqarfimmut nuuttariaqarput.

AtuaRaketimi ilaatigut Julian Lucialu illoqarfiit pingaarnersaanni Bogotami najugallit tusassavagut. Innuttaasut imminnut sorsuussimanerisa nakuusernerillu kingunipilui atugaraat. Atuarfik neriummik imminnut nunaminnut, siunissamilu periarfissamik pitsaasumik aallerfigisarpaat. Innuttaasut imminnut sorsuunnerisa kingunerisa ilagaat meerarpasuit angajoqqaaminnit avissaarnerat. Keiler Stiven anaananilu – pikitsit-sisuni FARC-ini ilaasortaasoq – imminnut nassaareqqissimasut tusaqarfigissavagut.

Suliniut Nunarsuaq Tamakkerlugu Atuarneq aqutigalugu nunarsuarmi atukkatigut assigiinngissusermut aamma meeqqat tamarmik atuartuunissamik piginnaatitaaffeqarnerannut ukkaseqataatitsivusi. Peqatigitillugu inuit piginnaatitaaffii aamma nunarsuarmioqatigiit anguniagaat 17-it pillugit ilinniarpusi taamaalillusilu nammineq ilinniarnersi pitsaernerulersillugu.



## UKIOQ MANNA ALLANNGUUT

Nunarsuaq Tamakkerlugu Atuarnerup (Hele Verden i Skole) suliniutit nutaat aallartippai. Maanna LæseRakettenip suliniaqatigiiffiit marluk tunuliaqutigilerpai: Oxfam IBIS aamma Red Barnet. Ataatsimoorluta Læserakettenip atuartitsissutillu ineriartortinnissaat qilanaaraarput, suli pissanganarlunilu atuartunut ilikkagaqarfiulluarniassamat.

Saqqummersitsivik Alinea aamma suleqatigalugu aallartipparput. Taakku atuagassiat oqaluttualiat alloriarfinnut pingasunoortut suliaaraat. Oqaluttualiat taakku meeqqanut Colombiameersunut allaatigineqartuni sammisanut tulluarput. Alineap aamma oqaluttualiat suliasartaat Hele Verden i Skolep nittartagaaniittut suliaaraat.

AtuaRaketimi ukioq manna inuit allaatigineqartut atuartitsinissamullu FN-ip nunarsuarmut anguniagaat immikkut sammivaat. Meeqqat Colombiameersut allaatigineqartut assiliartaanni – ikonitaanni – nunarsuarmioqatigiit anguniagaat tulluurtut allassimasarput. Immikkullu Colombiamut anguniakkat arfinillit toqqarneqarsimasut pillugit atuagaqarnerusinnaavusi.





# ATUARAKET COLOMBIALIAQATIGIUK



Kangerlussuarmit toqqaanaq Colombiami illoqarfiit pingaarner-saannut Bógotamut 7.178 km-iuvoq.



Colombia Amerika Kujallermiipqoq Kalaallit Nunaatalu affaata missaanik angissuseqarluni. Inuit 49 millionit tassani najugaqarput. Taakku ilagaat nunap inoqqaavi naggueqatigiit wayuut aamma andoquet.



Colombia sineriaqarlunilu qaqqaqar-poq. Qaqqarsuit Andesit kitaanni nunap pukkinnersortaani inuit amerlanerit najugaqarput. Kiattup orpippassuaqar-fia Amazonas kangianiipqoq. Piffinni amerlasuuni immakkt angallatit kisiisa atorlugit angalasoqarsinnaavoq. Avannaaniipqoq inoqajuitsoqarfik La Guajira imissaaleqiffioqisoq.



Nunami innuttaasut ukiut 50-it sinnerlugit imminnut sorsuupput. Naalackersuisut 2016-imi pikitsis-unut FARC-imut eqqissinissamik isumaqatigiissuteqarput, tamatuma eqqissinermik kinguneqarnissaa neriuutiginarpoq. Inupiluaraqatigiit, pinerluttuliorneq nakuusernerlu suli inuppasuarnut ulluinnarsiutaapput.



Colombia atukkatigut naligiinngiffi-unerpaat ilagaat. Ilaqutariit amerlasuut piitsuupput. Ilaqutariit ikittuaqqat nunap annersaa pigivaat. Sølviit gultillu saniatigut nuna aamaarutissaqaqaaq. Aamaruutissanik piiaaviit mingutsit-sinerannik nuna aserorterneqarpoq qanigisaanilu najugaqartut inuit eqqornerlunneqarlutik.





# Thaliana kuup sinaani najugaqarpoq

HEIDI BREHM ANDREAS BECK & HEIDI BREHM

Ullaaralaajuvoq. Umiatsiaaraq kuukkut iserajuttukut ingerlavoq. Timmissat kuuk sinerlugu nipaatumik timmipput. Thalianap anorsaanguarnera nutsami aalaneratigut malugisinnaavaa. Atuariartorpoq.



Thaliana 7-inik ukioqarpoq. Amazonasimi – nunarsuarmi kiattup orpippassuaqarfiisa annersaanni – kuup Guayaberop sinaani najugaqarpoq. Tamaani aqqusineqanngilaq. Angalassagaanni kuuk aqqutigisariaqarpoq.

Thaliana umiatsiaaqqamik atuariatortarpoq  
aatittarlunilu. Aqqutaani Esteban, Freddy Alejandrolu  
aqqusaarpaat. Sisamaannaallutik atuarfimminni  
atuartuupput.



Kuup sineriaa  
qorsooqissuuvoq.  
Sinaani saaniluaqqat  
seqinermeerujoorput.  
Thalianap qinerluarami  
takuai. "Kina  
tulliani saanilummik  
takoqqaassava?" Thalianap  
nukappiaqqat suaarpai.  
Orpigaaluit saaniluit  
uninngaffigisartagaat  
qinaasiffigaat.



Atuaqatigiit nerrivimmi  
ataatsimi issiapput. Thaliana  
nukarlersaagaluarluni  
allallaqqippoq. Oqaluttualiani  
kusanartunik titartagaler-  
sortuaannarpai. Ilinniartitsisup Luz  
Aurorap atuartitsissutini tamani  
atuartittarpai. Aamma qaqugu  
anitsiassanersut aalajangertarpaa.

Ullumi ulloq nuanneqaaq.  
Nukappiaqqat pinerit tamangajaasa  
arsarusuttarput. Ullumili  
toqqortaakkusupput. Thaliana orpiup  
angisuup tunuanut toqqorpoq.  
Aatsaat sivitsulaarmat Alejandrop  
nassaarivaa.







Thalianap anaanani Dorris ataatanilu Gustavo illoqatigai. Illu angutip illoqarfimmi najugallip pigivaa. Aamma taassuma uumasutai paaraat. Kukkukuut, hiistit nersussuillu. Thalianap kukkukuut atersorsimavai, kisianni kukkukuut assigiinnermik sorliunersut nalunartarput. Ataatani hiisternissaminut piffissaqaraangat nuannarisaqaa. Aamma nersussuaq immuiarlugu nuannarisaqaa.

Soraaraangami ilinniagassani suliarisarpai. Taava ataatani uumasunik nerisitsisoq ikiortarpaa.



Thalianap arnaata illu isumagisaraa nerisassiortarlunilu. Ilaanni ataataa kuummi aalisakkanik pisaqartarpoq. Aalisakkat Thalianap mamarinerpaasarai. Aalisakkat ikumatitap qulaanut nivinngarneqartarput, pujorsunnilaarlutik mamartaqaat.



Thaliana inuusarpoq. Nakorsaa-  
saarpoq. Uummataat naalaartarpai.  
Inuusat ajorunnaarniassagamik  
nakorsaatinik tunisipput. Illup ilua  
nipaaqaaq. Eqqaanni meeqqanik  
allanik najugaqartoqanngilaq.  
Thaliana pingasunik angajoqarpoq.  
Inersimasuugamik allami  
najugaqalernikuupput.



Amazonasimi seqineq tarriaar-  
tarpoq. Ulloq unnuarlu takeqqa-  
tigiipput. Taarsigaangat fjersyneq-  
qusaalertarami nuannarisarpaa.  
Doctor McStuffins imaluunniit Frost  
isiginnaartarpai. Elsap sikumik  
illorsualionera nuannarisaaqaa.  
Thalianap inuusani tutittarpai.  
Aamma ullaakkut makeqatigisarpai.



Ataataa qaammammut marlussoriarluni illoqarfiliar-  
tarpoq. Thaliana ilaarusuttarpoq. Illoqarfimmi Juana-  
mik atilimmik ikinnguteqarpoq. Thalianap Juana  
pinnguaqatigalugu nuannareqaa. Marluugaangamik  
piffissaq assut sukkasarpoq. Tulliani Juanalu  
pinnguaqatigiinnissartik erinigeqaa.



## HELEVERDENISKOLE.DK/THALIANA

Thaliana umiatsiamuta ilaasoq isiginnaarsinnaavarsi Amazonasimilu  
uumasorpassuit paasisaqarfigalugit. Aamma nunarsuarmioqatigiit angu-  
niagaat 4 Colombiamilu ilinniartitaaneq paasisaqarfiginerusinnaavasi.

4 ILINNIAGAARNEQ  
PITSAASOQ



# Team S.C.O.R.

☰ SANDRA SCHWARTZ 🎮 JENZ KOUDAHL



Anitsiarnissamut sianeq sianerpoq.  
Otto tupaallappoq. Tassa tiimi naariikatappoq.  
Otto arsaqatigiit ilisarnaatissaannik logomik sanalluni  
unammisitsinermut titartaaleraluarpoq.  
Unammisitsineq ullumimut killeqarpoq.

“Suli naammassingilanga,” Tom qiviarlugu oqarpoq.  
Tomili qungujuinnarpoq kaffimillu kuisilluni.  
“Otto, anillutit silaannarissalaarallaat!”  
“Ilersimaannarlanga?” Otto aperivoq.  
“Ilisarnaatissaliara suli naammassingilara.”

Ottop pappiaraataa Tommip nakkuppaa. Titarneqa-  
laaginnarpoq.  
“Isumassarsissaqqaarputit,” Tom oqarpoq.  
“Immaqa Conradip Runelluunniit ikiorsinnaavaatsit?”

Qanoq isillutik?! Taakku arsarneq kisiat qarasarmioraat.  
Ottollu arsarneq naluuippaa.  
Immaqa Otto arsarnatik allatut pinnguaqatigeru-  
sulissavaat arsartartoqatigiittut ilisarnaatissaannik  
torrattumik sanasuuppat.



Conrad klassimut iserpoq.  
"Otto hey, arsaqataarusuppit?"

Otto ileqimisaartorpoq.  
Målimiinnissaminut qunutuaallaarpoq aamma  
arsaq eqqorneq sapiivippaa.  
Isarussani atunngikkunigit iluamik takusaqar-  
sinnaanngilaq.

Rune iserpoq.  
"Otto ilaalerpit? Arsartumik ataasiinnarmik ilitsinni  
amigaateqarpugut."  
"Qujaannarpunga!" Otto akivoq. "Kingullermik ilaagama  
isarussakka aserorput."  
"Paarissavatsigit," Runep Otto eqitaajutigalugu  
oqarfigaa.  
"Aamma isarussatit paarissavagut;" Conrad  
arsarusuppaseqisoq  
illarluni oqarpoq.  
"Qaami," Otto oqarpoq. "Piareerpunga!"



Otto iliilu unammipput.  
Storm ilaalu v-klassermiut unammivaat.  
Ajorsaleqaat, 5-0-imik kinguaqqapput.

Ottop arsaq tigungaveersaarlugu arpasaqattaaginnarpoq.  
Naatsorsuutiginnigilluinnagaanik pisoqarpoq. Arsaaffiup  
sinaanut peruttortoq arsaq Ottomoorneqarpoq.

“Uannoork!” Conrad suaarpoq.  
Otto isimmitsissalluni piareerpoq.  
Hajja, Conrad asserteriasaarpoq.

“Uannut!” Rune suaarpoq.  
Runeli ungasippallaaqaq.

Ottop nammineq arsaq ingerlattariaqalerpaa.  
Akeqqani siulleq saneqquppaa.

Målit qanillivai.  
Otto illarpoq. Arsarneq nuannerseriasaarpoq.  
Immaqami arsarsinnaalaaraluarpoq?



Taavali ..!  
Otto tunuminiit sakkortuumik taklerneqariasaarpoq.  
Stormimit.

“Na’aa!” Otto niverpoq.  
Isaruai tammipput.  
Soormiuna aamma isumaqaleraluartoq periarfissa-  
qarluni?  
Storm arsallaqqissorujussuuvoq. Stormip arsaq  
ingerlatilerpaa.

Otto sequnngerpoq. Sianiitsutut misigaaq.  
Suut tamaasa ajutoortippai.  
Aamma Stormip Otto soqutiginnvivippaa. Kakkani-  
arujoorpoq.  
Nilliavoq. “Mål! 6-0! Stormip arsartui kakkattuugamik.”

“Arsarusukkunnaarpugut,” Rune oqarpoq.  
“Storm, illit arsaq kisermaatileraangakku  
nuannerunnaartarpoq.”  
Stormip iliisa arlallit Rune isumaqatigaat.



Conradip Otto ornippaa. "Ajunngilatit?"

Otto ikiorlugu nikuisippaa.

"Stormip iliuusaa kusanangilaq!" Conradip Otto tuiisigut pattalaajutigalugu oqarfigaa.

"Kamangilatit?" Otto aperivoq. "Uangaana aamma arsaq kisermaakkiga!"

"Kamangilanga, uagummi aamma asseqqatikkatta," Conrad oqarpoq.

"Stormip takliinera kusanaaqaaq! Taannaana aamma kisermaassisoq. Taamaammanuna aamma taakku unaminissaat eqiagileripput."

"Storm ingerlareerpat arsaqqissaagut?" Otto aperaaq. Atuaqataat Sally takkuppoq. "Qaa, aamma uanga arsaqataarusuppunga."

"Torrak!" Conrad oqarpoq.

Otto qungujuppoq. Taanna aamma arsaqqinnissaminut piareerpoq. "Taava ateqassaagut Team S.C.O.R!" Conrad Sallylu qungujupput.





Ottop arsaq tigoqqippaa. Kuuttuinnanngorluni  
kiagukkaluarluni nuannisaqaaq.

“Uannut!” Sally suaarpoq. Målertarfiup saavani  
piareqqavoq.

Ottop arsaq Sallymoorpaa.

Sally isertitseriassalluni piareerpoq.

Målmandip arsaq sumut isimmissaneraa eqqoriarpaa.

Talerpimmut tingivoq.

Sallyp arsaq ingerlateriarlugu målertarfiup saamiata  
tungaaticut isertippaa.

“Ijaaa,” Otto nilliavoq. “Team S.C.O.R siuaqqavoq.”  
Isaanissaannut sianeq sianerpoq.

“Anitsiarfiup tulliani arsassaagut?” Conrad aperaaq.

“Iligiit taakkuulluta?”

“Aap,” Otto akivoq. “Ilisarnaatissatta isikkusnaan  
isumassarsivunga!”



# Muna tupaal-latsinneqarpoq

☰ AISHA SHTIWI & LINE AGERLIN TROLLE 📷 NESMA AINSOUR

Za'atarimiittumi qimaasunut ineqarfimmi Muna anaanani ingiaqati-galugu angerlamut ingerlapput. Najugaqarfimminnut containerimut apuukkamik sunaaffa pulaartoqarlutik. Muna arpaannaq iseriartorpoq. Danmarkimiit allagarsiasaqarpoq. Karseq angisooq allakkanik titartakanillu kusanartunik ulikkaarpoq. "Inuullillaramali aatsaat allagarsivunga," Muna oqarpoq. "Meeqqanit hunnorujorpassuarnit allagarsivunga. Taama amerlatigisunit eqqarsaatigineqarsimagama nuannaqaanga."

Allakkat atuarlugit nuanneqaat. Meeqqat ilaasa qanoq najugaqar-nertik ilaqquttatillu oqaluttuarisimavaat. Muna Danmarkimi ikinnguteqal-lerpoq. Suli Mariam ikinngutiginerpaasaraa. Muna siunissamut allamik takorluugaqalernikuuvoq. Napparsimasut inuillu ikilernerqarsimasut ikiorsinnaaniassagamigit nakorsanngorusulersimavoq.

"Allassimasusi tamassi qutsavigerujussuarpassi," Muna oqarpoq. "Neriuppunga ullut arlaanni maanga Syriamut tikeraarsinnaajumaarissinga."



JORDAN  
2018

# Murhaba Nidal

☰ AISHA SHTIWI & LINE AGERLIN TROLLE 📷 NESMA AINSOUR

Nidalip allagarpasuit takullugit uerujussuarpoq. Allakkat atuartunin-gaanneerput, qallunaatut, tuluttut arabiamiatullu allassimasut. "Allakkanik titartakkanillu nassitsinikut tamaasa naapissinnaasuuguk-kit assut nuannissagaluarpog," Nidal oqarpoq. Ilaquttani inimi natermi issiaqatigai. Allakkat isiginnaarpat. "Ilaquttakka ilagalugit Danmark-imut tikeraarusukkaluarpunga," Nidal eqqarsarpasilluni oqarpoq. "Allak-kani Danmarkip Jordanillu erfalasuisa sanileriinneri nuannareqara."

Nidal qangali kingullermik anorimut qullartartumik sanasimavoq. Aasaq tamaat anora sakkukittarsimavoq. LæseRaketten aanaminut ikinngutiminullu taku-tissimavaa. Nidal meeqqanit Danmarkimiittunit tusaamaneqalersimammat alutoreqaat. Aamma tamanna Nidalip nuannareqaa.



## COLOMBIA ILISIMASAQARFIGINERULERUK

Nittartagaq Colombiap oqaluttuassartaa pillugu aamma Colombiami atuartuulluni qanoq innersoq paasisaqarfiginerusinnaavarsi. Assit filmillu takusigit inuiattullu erinarsuutit spaniamiutoortut wayuutoortullu tusaallugit. Aamma Colombiami nuna assigiinngisitaartoq takusassarsiorfigisinnaavarsi uumasullu pillugit ilinniartusi.



FILMIT ASSILLU  
COMBIAMEERSUT  
TAKUSIGIT

## COLOMBIAP NUNARSUARMIOQATIGIILLU ANGUNIAGAAT



Sammisami uani nunarsuarmioqatigiit anguniagaat taakkunanngalu immikkut Colombiamut pingaarutilit ilinniarsinnaavasi. Tassaasut: nunami piitsuussuseq, meeqqat atuarnerat, angutit arnallu naligiisitaanerat, silap pissusaa kiisalu atukkatigut naligiinnginnerup eqqissinissallu sulissutigineqarneranut tunngatillugit anguniakkat.

[HELEVERDENISKOLE.DK/LAESERAKETEN](https://heleverdeniskole.dk/laeseraketen)





FILMIT ASSILLU  
COMBIAMEERSUT  
TAKUSIGIT

## MEEQQAT ATUARAKETIMIITTUT ILISARISIMANERULERSIGIT



COLOMBIAMI  
MEEQQAT

Sammisami Colombiami meeqqat – COLOMBIAS BØRN – AtuaRaketi-mi meeqqat allaaserineqartut sulii ilikkarnerusinnaavasi. Nittartagaq assinik filminillu ulikkaarpoq. Takusinnaavasi Thaliana angallammik Amazonasip kuussuatigut ingerlaartoq aamma Elkin atuar-

toq. Luciap Bogotáp aqqusernatigoorluni Yusehillu atuarfimmi najugaqarfiutigisumit takusassissavaasi. Naggueqatigiit wayuut qiteriaasaat aamma Jennifer nissiaasoq takusinnaavarsi.

HELEVERDENISKOLE.DK/LAESERAKETTEN





**FILMIT ASSILLU  
COMBIAMEERSUT  
TAKUSIGIT**

## ASSASSORLUNI SULIASSAT



**COLOMBIA MALUGIS-  
SUTSIT TAMAASA ATORLUGIT**

Sammisami Malugissutsit tamaasa atorlugit Colombia – COLOMBIA MED ALLE SANSER – assassugassanik ilinniarsinnaavusi. Naggueqatigiit wayuut assassortagatoqaat paasisassarsiorfigisinnaavasi. Colombiamiut qiteriaasaat ilinniarsinnaavasi, nerisassiornissamullu najoqqu-

tassat nassaarisinnaallugit. Colombiamiut nipilersuutaat tusarnaarsinnaavasi spaniamiutullu erinarsuut ilinniarsinnaallugu.

## AKERLERIINNEQ, EQQISSINEQ NUNALLU INOQQAAVI

Colombiami naalakkersuisut pikititsisullu FARC eqqissinissamik isumaqatigiissuteqarsimapput. Nittartakkami nunami akерleriinnermut sivirusumut peqquataasut maannalu eqqissinissamik suliaqarneq pillugit ilikkagaqarnerusinnaavusi. Nunap inoqqaavi Colombiami najugallit taakkulu ileqqi ileqqulersuutigisartagaallu pillugit paasisaqarnerusinnaavusi.



**AKERLERIINNEQ  
EQQISSINERLU**



**INUIT PIOR-  
SARSIMASSUSERLU**

**HELEVERDENISKOLE.DK/LAESERAKETTEN**



# MARIAP PISARIA- QARTIPPAASI

Maria Jesus Fabiola arfiniliinnarnik ukioqarpoq. Colombiami nunaan-narmi najugaqarpoq. Illoqarfeeraa inoqajuitsutut panertigaaq. Nunami naatitsiniarneq ajornakusooqimmat nerisassanik imermillu amigaa-teqarput.

Mariap siunissaata pitsaanerulernissaa periarfissaqalerpoq. Atualersimavoq. Kisianni ilinniartitsisua ungasissumi najugaqarami ullut tamaasa aggerneq ajorpoq. Taamaattumik Maria ilanilu atuartitaanermik amigaateqaqaat, saniatigullu atuakkanik aqerluusanillu amigaate-qarput. Tamatuma kinguneranik atuarnerup allannerullu ilinniarnera ajornarnerulerpoq.

Meeqqat Mariatut inissisimasut ikiorsinnaavasi eqquiniutinik tunini-aagussi Oxfam IBISip Red Barnetillu suliniutaanut katersillussi. Nunar-suaq Tamakkerlugu Atuarneq-mi (Hele Verden I Skole) meeqqat Mariatut inissisimasut ikiortarpagut.

Eqquiniutit tunisat tamarmik iluaqutaapput. Neriuppugut ikiuukku-sussasusi.

**EQQUINIUTIT  
TUNISAT 30-T  
ATUAQATIGIINNUT  
ATORTUSSANUT  
NAAMMAPPUT**



# IMA IKIUSSINNAVUSI SIKUNNALLUSILU



Naak Colombia ungasikkaluaqisoq meeqqat atuakkami uaniittutut atugallit ikiorneqarnerinut peqataasinnaavusi.

Atuaqatigiit ataasiakkaarlusi eqquiniutininik marlussunnik tunisaqarussi 1.500 kr.-t katersussavasi. Ikiutissaq kusanaq. Colombiami atuaqatigiit ataatsit atortussaannut naammattut. Taamaamat atuaqatigiit minnerpaamik 1.500 kr.-nik katersigussi qujassutitut sikunnassaasi.

Allatuttaaq katersuiniarnissassinnut isumassarsiorsinnaavusi. Kaagininik atornikuilluunniit tuniniaasinnaavusi – nammineq sutitserusunnersi apeqqutaaginnarpoq.

Ilinniartitsisorsi eqquiniutininik akeqanngitsunik inniminneeqqis-sinnaavoq uannga [heleverdeniskole.dk/lodsedler](http://heleverdeniskole.dk/lodsedler)

## PUIUNNGISAAN-NAGASSASSINNIK MISIGISAQARSINNAAVUSI

Atuaqatigiit katersinerpaasimasut arfineq-marluk sikunnassaput pissanganartumillu misigisaqarlutik. Uku arlaannukarneq eqqorsinnaavarsi: LEGOLAND, Nordsøen Oceanarium, Fårup Sommerland, Randers Regnskov, Sagnlandet Lejre, Kattegatcenteret imaluunniit Vikingeskibsmuseet. Taakku arlaat eqqorusukkussiuk tamaviaaginnassaasi.

ATUAQATIGIIT  
EQQUGASSAANNUT  
TUNISISUT  
QUTSAVIGAAGUT





**JENNIFER**

# Jennifer piiaavillu

 HEIDI BREHM  ANDREAS BECK OG HEIDI BREHM

Ulloq immikkuullarippoq. Warrancami atuartut qinersissapput. Jennifer pissangavoq. Atuartut saallugit nikuippoq. "Avatangiisit mianerineqar-nissaat sorsuutigissavara. Pisinnaasarpud tamaat atorlugu pinngortitaq paarilluassavarpud," nipituumik ersarissumillu oqarpoq.

Atuartut sinniisussaannik ataatsimik qinersissapput. Tamaani nunap immikkoortuani arlalinnik atuarfeqarpoq. Atuarfiit tamarmik atuartumik ataatsimik qituumik atuartut aallartitaannut qinersissapput. Jennifer-  
ip atuarfiani atuartumik ataatsimik qinersissapput atuarfik tamaat sinnerlugu oqaaseqartartussamik. Jennifer neriuppoq qinigaassalluni. Taasinerit inernissaat maanna utaqqivaa.

Jennifer 10-nik ukioqarpoq 5.klassiullunilu. Colombiap avannarpasis-  
sani Warrancami najugaqarpoq. Anaanani nukkanilu marluk Lizette 3-nik Zuleinisilu 6-inik ukiullit illoqatigai. Qatanngutai angajullit sisamat allami najugaqalernikuupput.

Ilaqutarpasuatik eqqaamioraat. Ajartik sanileraat. Aanaat meterit hunnorujut marlussuit ungasitsigisumi najugaqarpoq. Jennifer soraaraangami ilinniagassani suliareriarlugit arpaannaq aanaminukartarpoq. Seqinnerluartillugu aanani alannormi issiaqatigalugu nuannarisaaqaa. Aanaa nissikullattaajutigaluni oqaluttuarterpoq.

## Naatitat toqungasut tomatillu qernertut

Jenniferip najugaqarfiata eqqaa naggueqatigiit wayuut najugaraat. Kinguaariipassuit ingerlaneranni tamaani najugaqarsimapput. Nuna aamaruutissanik ulikkaarpoq. Piiaavimmi sulisut ukiut 50-it sinnerlugit aamaruutissanik qalluipput. Nunarsuarmi aamaruutissat innaallagis-siornermi atorneqartarput. Aamaruutissat nivallugit lastbilerujussu-



arnut ikiorarneqartarput ingerlanneqarlutillu. Piiavik alliaartuinnarmat illoqarfeeqqani nunaqqatigiit tamakkertarlutik nuuttariaqartarsimapput. Maanna Warranca paaaviup killerpiaaniilermat immaq Jennifer ilaqaatalu allamik najugassarsionnissaat pisariaqalerumaarpoq.

Sioqqani kaktusit meterisut takitigilersimapput. Siallersarnera qaa-ngiutileraluartoq suli siallerpiangilaq, siallituaraangat imeq qerner-tuusarpoq. Piiavimmiit mingutsitsineq imermut pisarmat suna tamarmi qernertumik qallerneqarsimavoq. Tomatit qernertumik qalipaateqaler-tarput. Nerisassat salilluaqqaarlugit aatsaat nerineqartarput.

“Meeraagallarama kaktusini inheritat naasartut assut mamarput.” Aanani oqaluttuaraangat Jenniferip nuannarisaqaa. Warrangap allan-gorsimanagera oqaluttuarisarpaa. Tamaani naasut naasartut aanaata atorfissaqartippai. Naasut atorlugit katsorsaasiortartuuvoq, soorlu siuaasai wayuut ukiuni hunnorujorpassuarni taamaaliortarsimasut.



Jennifer anger-laraangami atuarfimmi uni-formini aqagu-mut piareerlugu errortarpaa. Qatanngutimini angerlarsimasuni angajullersaaga-mi ikiuuttarpoq.



Aana Jennifer, anaanaa qatanngutaalu. Allunaasat nivingasut siniffigisartagaannut nivingaaviupput. Jenniferip siniffigisartagaa arnaata sanaaraa.

Jenniferip meeraanini tamaat anaanami aanamilu mingutsitsineq eqqartoraat tusaasarpai. Inersimasut erngup mingutsinneqarneranik oqallittut tusaasarpai. Silaannarlu mingutsinneqarsimasooq aamma nalunngilaa. Aamarsuit pujoralaannit meeqqat napparsimalertarput. Piiavik mingutsitsisuuvoq. Jenniferip ilaqaataasa nunaqqataasalu paaavimmi aalajangiisartut paasitikkusuppaat paaaviup nuna aserorteraa. Nuna naggueqatigiit wayuut ukiorpassuarni najugarinikuusaat.

Illoqarfeeqqami illut marrarmik qisunnillu sanaajupput. Piiavimmi qaartartut atorneqarput. Aamaruutissanik piagassarsiorlutik qaartitsigaangata illup sajupillannera Jenniferip malugisarpaa. Jenniferip iikkani nutitsiternerit takusarpai. Nunami igitassat isigisarpai. Nalunngilaa arlaannik iliuuseqartoqartariaqartoq.

### Borgmesteri pilluaqqusivoq

Jennifer pissangavoq, qinigaassanerpa? Pissangangaarami naani annerai. Atini suaarutigineqartoq tusaavaa. Nuannaajallernerup pianik sinngortippoq. “Qujanaq. Qinerassinnga nuannaqaanga. Pisinnaasara tamaat maani atuarfimmi pinngortitamik paarsilluarnissaaq pillugu ikioqatigiinnissarput sulissutigissavara,” Jennifer atuartorpassuarnut ataatsimiigiarlutik katersuussimasunut oqarpoq. Qinersinerup kingorna Jenniferip ikinngutaalu igitassat qanoq immikkoortitertassaneritsik



Atuartut igitassanik immikkoortiterineq ilinniartarpaat. Pappiaqqat, plastikkit igitassallu allat ataatsimut iginneqaqqusaanngillat. Angerlasimaffimmi igitassat qanoq immikkoortiterneqarsinnaanerata aamma oqallisigisarpaat.

aamma sumut tamaanga eqqaanerup pinngortitamut kingunerisartagai oqallisigaat. Atuartut sinniisaaniilernini tulluusimaarutigaa. Ullut marluk qaangiummata borgmesteri atuarfimmumt pulaarpoq. Jennifer qini-gaasimaneranik pilluaqquaa. "Borgmesterip assaminnissaa takorloorsimannngisaannarpa," Jennifer qungujorujussuarluni ikinngutiminut oqarpoq. Neriuppoq Warrancami pinngortitap paarinnisaanut borgmesterip ikiussagaatik.

### Siunissamut takorluugaq


Jenniferip aanaata siunissami pisussat sinnattumini takusinnaavai. Oqartarpoq sinnattut isumaqartut. Sinnattut tusaaniartaraanni inuunermik allannguisinnaapput. Jennifer siunissamut paasisaqarusuppoq. "Maani Warrancami najugaqartugut qanoq piumaarnersugut ilimagaa-juk?" aperivoq. Aanaava siniffimmini nivingasartumi ingilluartitaarpoq ilumoorlaarlunilu oqarluni: "El Espíritu – anersaaq paarsisorput aamma siunissamut aalajangiinnaasoq – arlaannik pisoqartitsissaaq. Suli naluara pisussaq suussanersoq." Jennifer qilammut isigaaq: "Immaqa El Espíritu kaktussit inerititaat naateqqikkumaarpai? Immaqa El Espíritu qernertunik sialleqqinnginnissaa isumagiumaarppaa?" Jenniferip aanaava eqqarsaateqarpasilluni sikisarpooq tuinilu kiviimeriarlugit oqarluni: "Aap, immaqa."



### HELEVERDENISKOLE.DK/JENNIFER

Jennifer alakkarsinnaavarsi, naggueqatigiit wayuut ileqqi ilinniarsinnaavasi pilaavillu Cerrejón pillugu paasisaqarnerusinnaallusi. Colombiami piitsuussuseq klimaalu pillugit nunarsuarmioqatigiit anguniagaat 1 aamma 13 ilinniarsinnaavasi.





**ELKIN**

# Ilikkagassat amerlaqaat

 **HEIDI BREHM**  **ANDREAS BECK OG HEIDI BREHM**

Ullaaralaajugaluartoq seqineq kissaqaq. Elkin aqqusernit pujoralaqisut aqqutigalugit atuariartorpoq. Pissangangaarami naavi annernarput, qullinilu noqinneq saperpai. Elkinip atuarfikuni eqqarsaatigaa. Tassani atuartut amerlavallaangillat. Ilinniartitsisoq ataasiinnaavoq. Atuartitsissutini tamani atuartittarpai Elkinilu ilisarismalluarlugu. Atuarfik illuata eqqannguanippog. Atuarfikuanu suut tamarmik toqqis-sisimanarput.

Elkinip anitsiartarferujussuarmi meeqqat hunnorujut arlallit isaalersut isiginnaarpai. Isernissani kajumerinngilaa.

Elkin aqqanilinnik ukioqarpoq. Siullermik illumi nunaannarmiittumi angajoqqaani aleqamilu ernera Carlos Andrés illoqatigai. Tamaani atuarfiit ikittunnguupput 5.klassi tikillugu atuarfigineqarsinnaasut. Atuaqqinniaaraanni illoqarfimmut anginerusumut nuuttariaqarpoq. Qaammatit tallimat matuma siorna Elkin, arnaa Berenice aamma Carlos Andrés illoqarfimmut Macarenamut nuupput.

## Atuarfik nutaaq

Elkinip atuarfimmud allamut nuunnissani pissangageqaa. Ulloq siulleq atuariartunnginnermini qiavoq. Ilisarismannngisamini aallartinnissani annilaangagaa. Macarenami ilinniartitsisut malittarisassallu amerlane-rupput. "Atuarfikunni atisat atorusutagut atortarpagut. Maani Macarenami atuartut uniformii atortartussaavagut. Aalajangersimasumik ileqqoqartariaqarpoq," Elkin oqaluttuarpoq.

Qujanartumik Elkin ikinngutitaapallappog. Atuarfittaavani meeqqat ikiorluarpaat. Atuarfimmi angallappaat pissutsillu qanoq ittuunersut

oqaluttuullugu. Atuarfik angeqaaq. Ullaakkut katersuukkaangamik Elkinip meeqqat amerlagisaqai. Anitsiartarfimmi tunuleriaarlutik nikor-fasussaapput. Inuiaassutisimik erinarsuut atoreeraangassuk ilinniartit-sisut paasissutissiisarpuit.

### Periarfissarpasuit

“Ilisimatuujorusuppunga. Isumassarsiortuni nassaartortoq. Nunarsuar-mik allanngueqataassusaaq.” Elkinip atuarfimmi ilinniakkatik oqallisigi-leraangamigit isai uumaarissisarpuit. Ilinniartitsisup angut pencillinamik nassaartoq oqaluttuarisimavaa. Elkin eqqarsarpoq inuppassuit taas-suma annaassimassagai.



Elkin soraaraangami ilinniakkerisar-poq ikinngutinilu pinnguaqatigalugit. Pisuutit nammineq sanaarai, takisuu-mik ingerlanissani sungiusarpaa.



Atuafiup iigaani allassimasooq “Kinguariit eqqisseqatigiissut”. Elkin neriuppoq Colombiami iluamik eqqisseqatigiittoqassasooq. Neriutigaa angajoqqaami sorsunneq misigisimasaat nammineq misigissanagu.

Macarenami atuarfik periarfissanik allanik ammaassivoq. Internetimi paasissutissarpasuit ujaasiffigalugit nuannareqaa. Alapernaatsuuvoq. “Aanaanaga ataatagalu oqartarput siuariaateqarniaraanni ilikkartari-aqartut amerlaqisut. Sunngorniaaraanni ilikkagassat amerlaqaat,” Elkin qungujulluni oqarpoq. Atuarfimmi qarasaasiat atoraangamigit inter-netimi paasissutissanik ujaasisarpoq. Nassaartortartut, pinngortitaq uumasullu pillugit atuartarpoq.

Elkinip ataataa Baudelino nunaannarmi najugaqaannarpoq. Illu naati-tallu nakkutigai. Tallimangornikkut ilani aallugit angallammik Maca-renaliartarpoq. Sapaatit akunnerisa naaneranni angerlartarput. Elkinip angerlartarnini nuannarisaaqaa. Nipilersortoqarnanilu, nipiliortoqarnanilu angallappaluttoqarneq ajorpoq. Taamaakkaluartoq Macarenaliaqqinnis-sani qilanaarisarpaa – ikinngutini, atuarfik, interneti periarfissarpas-suillu illoqarfimmiittut uterfiginissaat.



Kuup sinaani najuk- kaminni uumasuu- teqaqaat. Elkin sapaatit akunnerisa naaneranni anger- larsimagaangami ikiuuttarpoq. Angu- taata pinngortitaq uumasullu qanoq paarineqassanersut ilitsersuuttarpaa.

### Elkinip takorluugaa

Arnaata neriuutigaa Elkin imminermiit pitsaanerusunik periarfissar- sissasoq. Nalunngilaa atugarissaassagaanni ilinniagaqartariaqartoq. Taamaammat inuunermiit allanngineq annertugaluartoq Macarena- mut nuupput.

Colombiami 10.klassi tikillugu atuarneq akeqanngilaq. Ilaqutariit atuarfimmi uniformit, allattaaviit atuakkallu pisiarinissaat namminneq isumagissavaat. Taamaammat ilaqutariit ilaasa meeqqamik atuartin- nissaat akissaqartinneq ajorpaat. Colombiami meeqqat inuusuttullu amerlasuut ilinniagaqarneq ajorput. "Elkin allanik ilaqutaqaraluaruni, allamik ataataqarluni, qularinngilara ilisimatuunngorusulluni takorluu- gaa piviusunngorsinnaassagaluartoq," Elkinip angutaa nikallungarpassil- luni oqarpoq. "Colombiami inuit atukkamik naliiginngeqaat. Pisuut piitsullu atugaat naliiginngeqaat. Assigiimmik periarfissaqanngilagut."

Qanoq atuarnermini ingerlatigisinnaanarluni Elkinip naluaa. "Politikki Colombiallu siunissaa eqqarsaatigivallaarneq ajorpakka – tamakku angajoqqaama oqallisigisarpaat. Eqqarsaatiginerusarpara ilinniagaqaru- maarnerlunga. Ilisimatuunngornissara kissaatigeqaara."



### HELEVERDENISKOLE.DK/ELKIN

Elkin atuarfiliaqatigisiuk. Macarenami illortik ataata- milu nunaataanut umiatsiamik ingerlanertik takutissa- vai. Colombiami ilinniagaqarneq atukkatigullu nali- giinnginneq pillugit nunarsuarmioqatigiit anguniagaat pillugit paasisaqarnerusinnaavusi.





# Sissaq saligaatsuutiguk

 DANIEL ZIMAKOFF  PETER SNEJBJERG

**K**ingusinaassanngikkutta massakut iliuseqartariaqarpugut! Eqqakkat sukujussuillu pinngortitaq aserulerpaat. Iliuseqarnissannut sapaatip akunnera periarfissaraara. Ullut unnuallu arfineq-marluk. 24 tiimit arfineq-marloriaaraanni 168 tiimit. Ullormut 2 kilo katersortarsinnaagukkit igitassat 14 kilonngorsinnaapput. Soorunami 7 x 24 tiimit sulisinnaangilanga. Kiillummita qassit katersortariaqarpat unammisitsinermi ajugaassagaanni? Pisiniarfissuarmi utaqqisuni tunuleriaani ilaavunga. Siuninni ilioraavimmiipput puut akimut ersittut qilertat sisamat.

“Hej Noah.”

Tunummut qiviarpunga, Annabel aamma puunik pisiniartooq tununniippoq.

“Soorluuna unammisussanngortugut”, qungujulluni oqarpoq. Qungujunnerata pissangaammersippaanga.

“Illit aamma ilaalerpit... Isumaqarlunga spejderinut tammaarsimaaqataalersutit?”

“Unitsiinnarneqarami. Uangami aamma Balimukarusunneruvunga.”

Anngaavunga. Sanilerput Annabel ajugaaffigisariaqarpara, atuaqatigiinni inequnarnerpaaq uteriinnerpaajugunartorlu. Mikigallaratta pinnguaqatigiittarpugut. Eqqagassanik katerseqatigiissinnaassagaluaratta, Danmarkimiilli ajugaasussaq ataasiinnaasussaavoq.

“Puussiaq?” Pisiniartitsisoq aperivoq.

“Avatangiisinut mingutsitsisuunngila?”

“Mingutsitsinngitsoq? Naluara. Puussiaannaavoq.”

“Taamaappat sussa. Imartatsinni plastikkit naammaqaat.”

Akiliisarfimmiit ingerlalerama qilertat marluk nakkaavakka. Annabelip isigaanga illakulullunilu. Soorunami taanna puussiarsivoq. Asuli ajugaanniaannarluni unamminermut peqataaniarpasippoq. Uanga avatangiisit eqqarsaatigalugit peqataavunga. Soorunami aamma Balimi tammaarsimaarfimmut Save the Planetimut peqataanissaq peqqutaagataalaarpoq, tassani Skandiaviami ajugaasut allat peqatigalugit nunarsuarmit suliniutaat Sissaq Saligaatsoq peqataaffigineqassaaq.

Suli angerlamut apuutinningsunga Annabelip qaangerpaanga.

“Sulilluarneq ajugaajumaarpoq!” Suaarpoq.

Ataasinngornermi ullaakkut arfinernut sikkilit kalitalerlugit sissamukarpunga. “Sissaq saligaatsoq”-mut piareerlunga. Aasaanerani atuannngiffik aallarteqqammivoq. Seqineq nuereersoq nuissanit anorimit ingerlaartinneqartunit asserneqallattaavoq. Taquarpassuit, imeq nillertoq imiisivimmi igalaaminermi, naluusit, creme seqinermut illersuut ajaappiaasarlu igitassanut tigooraassutitaara nassarpakka.

Inuk kisima sissami sikkiliniit niugama sissami eqqagassat sioqqani qaartuni ersareqisut isigaakka. Sullisinik aaqqaseriarlunga aallartippunga. Tigooraassutitaara nammineq aningaasaatinnik pisiaraara naatsivitsinnilu sungiusarlunga katersinikuullunga. Anginerusunut katersissutigalugu iluarnervoq soorlu puukunut, qillertusanut, sikut puukuinut. Sikaritsit kimmiviinut siminnullu katersissutigalugu pitsaavallaanngilaq. Tujuuluaraq Avatangiisit paaralugit –mik allagartalik atorpara. Kimmivikut pappiaqqallu oqitsuaraagaluartut katersorpakka, tassami avatangiisit pillugit suliaqarama.

Nalunaaqutaq marlungormat kiassuarmik ulapinnermillu qasuuppunga. Pooq ataaseq ulikkaarpara... -ngajappara. Immamut aqqartariaqarpunga. Massakut! Sissaq suli inoqanngimmat qarleeqqakka ilupaqutikkalu peerpakka. Naluusima niutaata aappaa ateruttorlugu ...

“Hej Noah.”

Annabel! Tupangaarama sioqqanut niverpunga. Allarummik asseriarlunga naluusikka majorteqivakka. Hajja! Kissarullerujussuarnera seqernup kissarnerinnaanik patsiseqanngilaq.

Annabel illakusuppoq. Sikkilerpoq poorsuarmik nassarluni.

“Hej,” oqarpunga.

“Pooq ulikkaareerakku? Qassinut aallartikkavit?”

“Ullaaralaaq.”

“Taamaassimassaaq, nalulerpit? Nalunninni pooq paarissavara?”

“Aap, naamik ... pisariaqanngilaq.” Tatigisinnaanerpara?

“Okey. Uanga aallartittariaqarpunga, kisianni maaniunngitsoq, illimmi manna sissaq støvsugersimannguatsiarpat.” Aalaterivoq sikkiliniilu aqqusineeqqamukaallugit. Atisaqanngitsunga takunerpaanga?

Anaama nerilernerarluta sianernissaata tungaanut katersivunga. Taava pooq ulikkaartoq kalitannut ikillugu sikkilerlunga angerlarpunga. Annabel takoqqinngilara. Atuarfimmi oqaluttuarissanerpa atisaqanngitsunga takusimallunga? Qujanaqaarmi aasaanerani atuannngiffeqaratta.



Garageami pooq qinngorlerpaanngorlugu inissippara. Nerereeratta oqimaalutaavik nassarlugu garageamukarpunga. Pooq 2 kilonik oqimaassuseqarpoq. 7 X 2 14-iuvoq. Taamaallaat 14 kilo... Ila minnerpaamik 15 angusariaqaraluarpara. Illortaara Jyllandimioq oqaluttuarpoq Norgemi ajugaasup 15,3 kilot katersorsimagai.

Aqaguani ullaakkut sissamukaqqippunga. Allaaqqissuaq. Unnukkut innajaariarlunga Youtubemi videot Balimeersut isiginnaarpakka. Bali nuannerpaseqaaq: sissaq, qorlortut, orpippassuarujussuit aapakaallu nujuartat aqqusinerni. Ila unammisitsinermi ajugaarusukkaluaqaanga.

Naatsivitsinnit Annabelilu anillaqatigiippugut.

"Hej Noah." Aatsaarpoq. "Ippassaq qanoq katersisimatigivit?"

"Pooq ataaseq."

"Kakkaak, pooq ataaseq! Ila hii, ajunngikkaluarpit?"

Annabel nakkuppara. "Illit qanoq katersitigaat?"

"Puup affaa. Illit katersatit qanoq oqimaatsigippat?" Annabel qungujulluni aperaaq.

"2 kilo."

"Taava ilungersornerusariaqarpunga. Takuss'."

Ataasinngornermiit tallimangornermut ullaamiit unnummut ulapissuaartarpunga. Ullut tamaasa pooq ulikkaangajattarlugu. Qujanartumik unnuat marluk anorlingaatsiarami, taamaalluni eqqagassat sissamut tippussuupput. Katersineq sungiulluariarakku sukkatsippunga.

Arfininngornermi ullaakkut puut arfinillit katersarilerpakka, eqqagassat 12 kilongajaat. Isikkanni qaanneqalerpunga talikkalu sanneqqallutik. Arfineq-pingasunut ullaakkorsiorpunga. Ataatama piareersaqatiginiarlunga makiaarpoq. Taqualiani puussiamut ikileraluarpai.

"Ataata, eqqaamallugu mingutsitsinngitsunik atuinissaq."

"Okey, puussiarmi nalinginnaasoq atoqqinneqarsinnaavoq."

"Aap, kisianni pinngortitamut pisartut amerlaqaat."

"Aap, ajoraluartumik taamaappoq. Eqqaamassavat ualimut aanaa inuuliassagatsigu."



"Aappi, naatsorsuutigaara taamaalitinnagu anguniagara angusimassallugu.... Sisamanummaa?"

"Marlunut."

"Shit, taava ulapittariaqarpunga."

Sukkasuumik sikkilerpunga. Anguniara 15 kilo angunngitsuussavara. Sissamut aqquataani Annabel naapippara. Sikkilimi saniani qasorpaseqaluni nikorfasoq uniffigaara.

"Ajunngilatit?"

"Sikkilit kalunneri katakkamik, ikkunneq sapilerikka." Assani qernertuinnaat takutippai. Piffissaqannginnama akunnattoorpunga.

"Atagu misilillara," oqarpunga. Oqarasuaatiga tiguara.

"Qujanaq, kina sianerfiginiarit?"

"Qanoq sikkilit kalunneri ikkunneqartarnersut Googlerniariga," oqarpunga.

"Torrak!"





Youtubemi videomik nassaarpunga. Ajornanngippaseqaaq.

“Immaqa uanga 15 kilo annerpaamik 16 angussavara. Illimmi?”

Annabel anersaarululluni oqarpoq.

“Æhm...Puut uuttortaqqamminnginnakkit.” 16 kilo! Qanoq ililluni taama katersitigisinnaagami?

“Qillertuusat puukullu sioqqanik imermillu imaqaqqusaanngillat,” oqarpunga.

“Nalunngilara, kisiannimi imaqalaanngitsoorsinnaanngillat.”

“Taamaassoormi. Kalunnerit ikkupput. “Assakka qernertuinnangorsimapput.

“Noah qujanaq. Pitsaanersaavutit.” Assani qernertuinnaat aalatippai. “Nalunngualaarta?”

Piffissaqanngilanga, kisianni...Annabel naaggaarsinnaanngilara. Naluusikka nassarpakka assakalu qernertuinnaallutik. Allarummik asserlunga naluusilerpunga. Annabel iluatigut naluusilereersimavoq. Ulloq siulleq pisoq eqqaamanerpaa?

Pinnguarluni nalunneq nuanneqaaq. Sivisuallaamilli naluppugut.

Puup affaa tikikkigalu anaanaga sianerpoq.

“Noah, marlunut qiteqquppoq, angerlartariaqalerputit.”

“Kisiannimi ... anaana, anguniagara suli angunngilara.”

“Noah, aanaap takkunnissat naatsorsuutigaa. Takkutinngikkuit pakatsissaaq.”

“Okey.” Aanaga nuannareqigakku pakatsisikkusunngilara.

Uanga taakaniinnerput peqqutaalluni 1-inngunngitsoornissara eqqarsaatigiinnavikkakku lagkage kisiat iluarusuutigaa. Sapaammi unnukkut atuarfiup eqaarsaartarfianut puut tunniuttussaavakka. Tassani unammisut eqqagassaataat tamarmik uuttortarneqassapput. 24 tiimit ataallugit anguniagara anguniartariaqarpara.

Inuuissiortumiit unnukkut arfineq-marlut eqqaanni angerlamut apuuppugut. Sikkilikka piareersapallappakka.

“Noah, aamma eqqakkanik katersueqqilerpit?” Najaga aperivoq.

“Allatummi ajornaqaaq.”

“Qasullaannginnavit? Ikiussavakkit?”

"Ikiorneqaqqusaanngilagut. Unioqqutitsissaanga ikiorumma."  
"Kisiannimi siallerpoq," anaanaga oqarpoq. "Nereqqaassannginnavit?"  
"Nerinngiinnassaanga."  
"Okey. Taarsinnginnerani angerlassaatit."

Sikkilerlunga sissamukarpunga. Sialleqaaq. Taarsinissaanut suli akunnerit pingasuupput.

Aqqutaani Annabel naapippara. Liza atuaqaterput ilagaa. Annabel Lizalu tamarmik puumik tigumiarpuit, takugaminngali Annabelip puut tamaasa tigupallappai. Allanimmi ikiorneqaqqusaanngilagut. Lizamuna Annabel eqqakkanik katersinerani ikiorsimaneraa?

"Hej Noah, Lizamuna tigumiaqatigiinnaraanga. Aatsaat aallartilerpit? Siallertigisoq."



Inuissiertumiissimalluta oqaluttuarpunga, Annabel oqarpoq ullormut pooq kingulleq immersimallugu. Sapaammi ualikkut Liza ataataalu umiatsiartaavanni kusanartumi angalaaqatiginarlugit oqarpoq.

"Ilaasinnaavutit," Liza oqarpoq. "Aqagugooq seqinnissaaq 25-nillu kialluni. Taquarluta naluusigullu nassarlugit qeqertamukassaagut." Illakuluppoq.

"Qujaannarpunga, uanga piffissaqanngilanga." Aapillerpallappunga. Annabel oqaluttuarsimanerpa qarleqanngitsunga takusimallunga?

Ulapeqaaq. Annabel sapaammi eqqagassanik katersissanngippat imaassinnaavoq ajugaaffigisinnaagiga. Qillertuusaq ataaseq, juicep puukua mikisualuppasuillu. Katersorneri sivosoqaaq kisianni oqittuaraapput. Katersunngiinnassanerpakka? Naamik. Avatangiisit pillugit taamaaliorpunga. Ajugaanissaaq kisiat eqqarsaatiginngilara. Pappiara masattoq panertumiit oqimaanneruvoq, taamaammat atisakka masammik oqimaalligaluartut siallernerpa oqalorjuutiginnilara.

Akunnerup ataatsip ingerlanerani puup affaata affaanna immerpoq. Kaappunga imerusullungalu. Imissara tamaat imereerpara.

"Hej Noah."

Ataata sikkilerluni takkuppoq nerisassannik nassarluni. Sandwich imerlu. Minutsit tallimat ataallugit nerisassakka nunguppakka. Pappiarartaat puumut ikivakka.

"Ataata, qujanaq, ingerlaqqittariaqarpunga."

Ataata sikkilerluni angerlaqqippooq. Nalunngilaa ikioqqusaanngitsunga. Ikiorneqaraanni unamminermit peersitaanermik kinguneqassaaq.

Sapaammi unnuppoq. Puut atuarfiliaanneranni ataatama ikiorpaanga. Piffissap naanissaa tikivillugu ulapippunga. Puut uuttortarakkit 15,4 kiloppuit, imaassinnaavorli atuarfiup oqimaalutaata uuttuisarnera allaalaartoq.

Ataata bilerluni atuarfiup anitsiartarfianut iserpoq eqaarsaartarfillu tikivillugu unilluni. Taamaalisorlu Annabel eqaarsaartarfimmiit anivoq.

"Hej Noah, angumerseqqarputit."

"Nalunngilara. Katersatit qanoq oqimaatsigaat?"

“15,8. Siuttuuvunga, illilli katersaqarnerusimassaait.”

“Taamaakkunangilaq.” Hajja, aanaamut inuuissiertuliarsimangikkaluaruma ajugaasimasinnaagaluarpunga.

Ataatalu puut eqqussorpagut. Annabelip ikiorpaatigut.

Uumassusilerinermi ilinniartitsisorput Anders tigooraasuuvoq.

“Kakkaak sulilluarsimagavit. Noah, ullut tamaasa katersisaravit?”

“Taamaaliortarpoq,” ataataga oqarpoq. “Seqernup nuineraniit tarrinnissaata tungaanut.”

“Taamaangilaq,” nipikitsuliorpunga.

“Ikiorneqanngilatimmi?” Andersip isikkut isigalunga aperivoq.

“Aap,” akivara.

Maanna puut misissorneqarput uuttortarneqarlutillu. Igalaaminernik ujaqqanillu imaqaqqusaanngillat qillertuusallu imaarnikuusallutik.

“Noah, ajorpasinngemaal, qanoq oqimaatsiginersut takoriartigit.”

Oqimaalutaavimmu qaleriiaarneqarput. Isiginnaarpakka, Annabel pissangalluni ataatama saniani nikorfavoq. Kisitsisit digitaliusut aalariarlutik unippu ... 15,7!

Anersaaruluppunga.

Anders oqaaseqanngilaq. Annabel nillerpoq – Yes!

“Pilluarit,” oqarpona.

“Qujanaq, ajuusaarpunga aamma illit ajugaaqataannginnavit.”

“Ajunngilaq...” Taamalisorlu isikka qullinippu. Qullit ulussakkut kuulerput. Annabel tunuppara. Peqqusiileqinaq!. Meeraaqatut qianeq, qulliikka takunerpai?

Ataatama tuppallersarniarlunga tuikkut tigugaluaraanga ajappara. Soormiuna aamma inuuissiertumut ilaasimasunga? Aanagami ukiut tamaasa inuuissiertarpoq. Balilu inuunermi ataasiaannarluni misigisassaavoq.

Nerinanga innarpunga. Atisaqaannarlunga qipittorlunga. Timera tamarmi annernarpoq. Inuuninni aatsaat taama ilungersortigalunga suliaqarpunga, suallappungamita?

Kasuttortoqarpoq.

“Naamik,” oqarpona.

Matu ammarpoq. Isertoqarpoq. Anaanaasimassaaq. Oqalorujussallunga qiviarpara... Annabel isersimavoq. Sigguni kiivai.


“Ajortuliorama,” oqarpoq. “Lizap angalaaqataasinnaaniassagama

puumik ataatsimik ikioraminga.”

“Okey,” oqarpona, sooruna Annabelip oqaluttuukkaanga? “Oqaatiginaviangilassi,” oqarpona.

“Nalunngilara, taamaattuunngilatimmi. Aamma taamaliornissat pisariaqanngilaq, uanga nammineq Andersimut oqareerpunga. Ingerlasimatsiartutit oqarpona. Pooq ataaseq peermagu katersukkakka 13,7-imut killipput. Illit ajugaavutit. Neriorsorakku oqaluttuukkiartussallutit.”

Annabel anivoq. Siniffimmi issiavunga ajugaasimaneralu upperilerniarsaralugu. Youtube iserfigaara. Videomik Balimeersumik ataatanut anaannullu takutikkusutaqarpunga.





# Lucia illumi parnaaqqasumi

📖 STINE BANG 📷 ANDREAS BECK

Qaqqap sivingarnani aqqusinerni qummukajaaqasuni illut ipput. Tamakku qeqqarpiaanniippoq illunnguaq mikisoq sungaartoq. Illup saavani meerarpaaluit pinnguarput. Qimmiaaraq pangaliinnaq saneqquppoq. Nukappiaqqap mikisup illarluni malippaa. Matserfimmi aanaata meeqqat nakkutigai. Qungujulavoq.

Pinnguarunnaariaaarput. Aanaata isaatippai matulu silataaniit matoriarlugu parnaarlugu. Aqqusineq nipaaruppoq.

Lucia qulingiluanik ukioqarpoq Colombiamilu illoqarfiit pingaarnersaanni Bogotámi najugaqarluni. Aanaata pisiniassagaangami illumut isertitarpai matulu parnaarlugu. Paariniarlugit taamaaliortarpoq.

## Takornartat tatigisassaangillat

Colombiamiut oqartarput sapiiserpallaartariaqanngitsoq. Sillimaanavittariaqarpoq. Taamaammat Lucia inersimasunik ilaqartinnani silami pinnguaqqusaanngilaq. Aamma nammineerluni atuarfimmiit angerlaqqusaanngilaq. Atuaqatinilu atuareerunik pinnguaqatigiinnissaminnik isumaqatigiissuteqarneq ajorput. Naluaaluunniit sumi najugaqarnersut.

Luciap anaanani aqqalussanilu najugaqatigai. Anaanani illoqarfimmi ulloq naallugu sulisarmat Lucia aanaminiittaqaq eqqannguminni najugaqarmat. Aanaavani arnaata qatanngutai suli meeraasut najugaqarput. Luciap ajai angaavilu. Ilaasa Lucia peqatigiinnangajappaat. Aamma illortaavi tassani najugaqarput, taamaammat pinnguaqatissaqartaqaat.



Colombiami ilaqutariipassuit kinguaariit arlalikkaarlutik najugaqatigiittarput. Luciap aanaata ilaqutariit meerartai paarisarpai inersimasut aningaasarlutik suliniassammata. Amigaateqartoqaraangat ikioqatigiittarput.

Illoqarfiup immikkoortua Luciap najugaqarfigisaa piitsaqarfiuvoq, inupiluaqatigiinnut ilaasut amerlapput ikiaroonartunik tuniniaasartut – aamma meeqqanut. Luciap tusarnikuuaa inupiluit meeqqanik aallarussisartut meeqqallu timaasa pisataanik ilorlernik pisuunut tuniniaasartut.

Taamaammat arnaata sissuernissaanik ilinniartinnikuuaa. Luciamut takornartat tatigeqqunngilai aamma takornartanik ingerlaqateqaqqunngilaa. Taamaakkaluartoq arnaata Lucia suli isumaalugisarpaa. "Arlaannit biilertunit isai asseriarlugit aallarunneqaratarsinnaaneranut illersorsinnaanngilara."

### Atuarfik toqqissisimanartoq parnaaqqasoq

Luciap atuarfia Bogotámút isikkiveqarluni qaqqap sivingarnaniippoq. Tamarmik soraarput. ataasiinnarluunniit ingerlaannq aninngilaq. Atuarfimmut isaavik parnaasaaterujussuarmik parnaaqqavoq pigaartorlu tassani nakkutilliilluni. Qarliisa qitequtaanni walkie talkie nivingavoq,

illuatungaani anaataq. Ulorianaatilimmik pisoqalissagaluarpat akulerunnissaminut piareersimavoq. Isaaviup silataa tungaani ataatarpassuit anaanarpassuillu meeqqat aninissaat utaqqivaat.

Siusinnerusukkut meeqqat ilaat inuusuttualunnit atuarfiup silataani mamakujuttunik tunisinnikuupput. Kisianni mamakujuunatik ikiaroonartuusimapput. Taamaammat maanna atuarfiup nakkutilliinini annertusimavaa.

Paarsisup isaaffik ammarmagu meeqqat angajoqqaallu imminnut nasaaripput. Luciap anaanani aqqalussanilu inuppassuit akornanniittut takuai. Lucia qungujuppoq tummeqqatigullu qummut arpalluni. Anaanaminut eqitaartippoq. Aqqusernit sivingasuut amitsullu atuarlugit angerlamut ingerlapput. Luciap ullup ingerlasimanera oqaluttuaraa. Anaanani ilagigaangamiuk aqqusineritigut ingerlatilluni toqqissisimasarpoq.

Lucia 5.klassimi atuarpoq. Nalinginnaasumik ajaminit aatittarpoq. Takugaangamiuk anaanami aasimalluni ungalut silataanni utaqqigaani assut nuanartarpoq.





Luciap nuannarisaaqaa atuakkanik atuarnis-saminut piffissaqaraangami. Anaanani anger-larsimaqatigigaangamiuk ikiuuttarpoq. Atisanik errorsisarpoq eqqiaanermullu ikiuuttarluni.

### Inuunermillu sinnera pilluarlutik inuupput

Angerlamut apuukkamik atuakkanut saapallappoq. Oqaluttualiat nuannarinerusarpai. Prinsit prinsessellu ulorianartorpassuit aqqusaqqaartarpaat, oqaluttualiali naaneri ajunngitsuujuaannarput. Snehvide inuarullikkallu arfineq-marluk nuannarinersaavai. Aqqalussani atuffanniaraluarpaa, taassumali arsaq angisooq aappaluttoq pinnguarerusunneruaa. Luciap illaatigaa atuffateriaqqillugulu, taannali soqutigisaqanngilaq. Siniffiup kiluata ataanit atuagaq tiguua. Nammineq oqaluttualiaminik allalluni aallartinnikuuvoq, oqaluttuap imarivaa Rosita timmiarlu - ikinngutigii imminnut asasorujussuit. Eqqarsariarluni allalluni aallartippoq: Rositap takusinnaavaa timmiaq aliasuttoq sunalu aliasuutigineraa aperalugu. "Ilinnununa tunissutissaqannginnama."

Luciap oqaluttualiat nuannareqai. Suli naluaa oqaluttualiani qanoq naaneqassanersoq. Nalunngilaali oqaluttuami naanerani inuunermik sinnera pilluarlutitalimmik naajumaartoq.



### HELEVERDENISKOLE.DK/LUCIA

Luciap atuarfia alakkarsinnaavarsi aamma Bogotáp aqqusernisigut Lucia arnaalu ingerlasut malinnaavigisinnaavasi. Nunarsuarmioqatigiit ilinniagaqarneq pillugu anguniagaat 4 aamma 16 ilinniarsigut aammalu Colombiami eqqissinissaq.





## Oxfam IBIS

Oxfam IBISip nunarsuarmi piitsuussutsimik naligiinnginnermillu akiuniarnermut peqataavoq. Inuit tamarmik pitsaasumik ilinniagaqarnissamik piginnaatitaaffeqarnerat suliniutigaarput. Siuliani taaneqartut imminnut ataqatigiipput. Ilinniagaqarneq siunissamik pitsaanagerusumik pilersitsisarpoq namminermt, ilaqtutanut nunagisamullu. Oxfam IBIS Danmarkimiittoo Oxfamip ilagaa – nunarsuarmi ineriartortitsinermik suliniaqatigiiffiit annerpaat ilaat. Ukioq kingulleq inuit 19,2 millionit sulinerput iluaqtugaat.



Ulloq 5.oktober Ilinniartitsisut Ulloraat. Ulloq taanna Oxfam IBISip Danmarks Lærereforening peqatigalugu ilinniartitsisut suliaat pingaarutillit Danmarkimi nunarsuarmilu nalliuttorsiuutigisarpaat.

## ILINNIARTITAANEQ PILLUGU OXFAM IBIS IMA SULIAQARTARPOQ



### 1. Atuartitsineq pitsaasoq

Atuarfimmi pitsaasumi meeqqat atuarneq, allanneq kisitsinerlu ilikkartarpaat. Suleqatigiinneq ajornartorsiuutinillu qaangiiniaqatigiinneq ilinniartarpaat. Pingaaruteqarporlu aamma meeqqat piginnaatitaaffimminnik qanorlu nunaminni eqeersimaarlutik ineriartornermullu akuullutik peqataanissaminnut ilinniarnissaat.

### 2. Ilinniartitsisoq pitsaasoq nikisitsisarpoq

Ilinniartitsisut ilinniartitaanerat suleqataaffigaarput. Ilinniartitsisoq pitsaasoq fagimut pikkorissuuvoq. Ilinniartitsisup aamma atuaqatigiit toqqissisimanissaat, atuaqatigiit tamarmik – nivarsiaqqat nukap-piaqqallu – atuarnerminni ineriartornissaat eqeersimaarlutillu akuunis-saataat pilersittarpaat.

### 3. Atuarfik inuiaqatigiit ilagaat

Atuarfik pitsaasuussaguni piffimmi inuiaqatigiinnit angajoqqaanillu tapersorneqassaaq. Taamaattumik Oxfam IBISip atuarfimmi siulersuisut angajoqqaallu siunnersuisoqatigiivi tapersersortarpari. Angajoqqaat ilaat atuartuunikuunngimmata angajoqqaanik pikkorissaaneq ingerlat-tarparput atuarfimmi sulinermt ilaaniassammata.



### 4. Danmarkimi nunarsuarmioqataanermik atuartitaaneq

Oxfam IBIS isumaqarpoq Danmarkimi atuar-tut nunani allani meeqqat inuunerat pillugu ilisimasaqalernissaat pingaartuusoq. 2004-miilli LæseRaketten saqqummersittarparput ukiut tamaasa nunami aalajangersimasumi meeqqat inuunerannik imaqartartoq. Tamatuma saniatigut Oxfam IBIS Nunarsuaq Tamakkerlugu Atuarneq-mut ilaasarpoq, tassani FN-ip nunarsuarmioqatigiinnut anguniagai atuarfimmi sammeneqartarput.



**OXFAM  
IBIS**



## Red Barnet

Red Barnetip meeqqat tamarmik ajunngitsumik inuuneqarnissaat suliniutigaa. Nunarsuarmi tamarmi meeqqat ineriartornissaminnut atuarfimmilu pitsaasumi atuarnissaminnut periarfissaqassapput.

Red Barnet nunarsuarmi meeqqanik ikiuiniarnermut suliniaqatigiiffiit annersaannut Save the Children-imut ilaasortaavoq. Nunat 120-nit amerlanerusut suliffigaagut. Ukioq kingulleq nunarsuarmi meeqqat 155 millionit Save the Childrenimit ikiorneqarput.

Red Barnet Danmarkki tamakkerlugu 60-inik immikkoortortaqarfeqarpoq. Taakku meerarpassuit inuunerminni nukittuunik inersimasortassaminnik amigaaqartunut namminneq piumassutsiminnik ikiuuttarput.



Ulloq 20. november Meeqqat Piginnaatitaaffiisa ulloraat. Ulloq taanna Red Barnetip ambassadørskolellu Børnekonventioni aamma meeqqat piginnaatitaaffii atuarfiit allat peqatigalugit nalliut-torsiutigaat assigiinngitsunillu pisoqartitsillutik.

## ILINNIARTITAANEQ PILLUGU RED BARNET IMA SULIAQARTARPOQ

### 1. Atuarfiit nunarsuarmi sakkortuumik pisoqarfinniittut

Nunami ajunaarnersuaqartoqaraangat atuarfiit amerlasuut aserugaasarput. Meeqqat ajunaarnersuaqartoqareernerata kingorna piaartumik atualeqqinniassammata atuarfiugallartunik pilersitsisarput.



### 2. Qimaasut meerartaat atuarfimmii pitsaasumi – Danmarkimi nunarsuullu sinnerani

Meeqqat sorsuffinnit qimaasutunami qimaasutut inissisimalerfigisaminni pitsaasumik atuarfeqarnissaat sulissutigaarput. Atuarfiit toqqis-sisimanartuussapput meeqqanullu sakkortuumik misigisaqarsimasunut tapersersuisuussallutik.

### 3. Nunarsuarmi meeqqat piitsuunerpaat

Nunarsuarmi meeqqat piitsuunerpaat atuartuunissaat sulissutigaarput. Meeqqat tamarmik atuartuunissamut periarfissaqassapput. Nunarsuarmi siuttuusut neriorsuutigini kuuuat 2030-mi meeqqat tamarmik atuarfimmii pitsaasumi atuarnermik, allannermik kisitsinermillu ilinniarlutik atuartuussasut.

### 4. Skoletjenesten ambassadørskolellu

Skoletjenesten qulequttanut pingaarutilinnut soorlu meeqqat pisinnaatitaaffiit, nunarsuarmi ajunaarnersuaqarfiusunut, Danmarkimi piitsuussutsimut pimmarinnittarnermullu tunngasunik atortussanik peqarpoq. Red Barnet 75-inik ambassadørskoleqarpoq. Atuarfiit taakku nunarsuarmioqatigiit anguniagaat meeqqallu pisinnaatitaaffii immikkut ukkataaraat.



**Red Barnet**



# TAAMAAM -MAT UKU ATUASSA- VATIT...

## TEAM S.C.O.R.




ATUAKKIORTQ  
SANDRA SCHWARTZ

### TEAM S.C.O.R.

Sandra Schwartzip oqaluttuaaraliaa -Team S.C.O.R.- ikinngutigiiinnermut, arsarnermut imaluunniit allaanerusunik piginnaasaqarnermut tunngasunik imalik nuannarigukku atuassavat. Kiserliornarsinnaasarpormi titartaaneq nuannarigaanni allat tamarmik arsarneq nuannaripassuk. Immaqa massa apeqqutaavallaanngitsoq pikkoriffiit suunersut ikinngutaalluaraanni ataatsimoortunullu akuulluaraanni?

## SISSAQ SALIGAATSUUTIGUK



ATUAKKIORTQ  
DANIEL ZIMAKOFF

### SISSAQ SALIGAATSUUTIGUK

Daniel Zimakoffip oqaluttuaaraliaa -Sissaq saligaatsuutiguk- ikinngutigiiinnermut, unneq-qarinnermut, unamminermut asanninnermullu tunngasut nuannarigukkit atuassavat, soorunami aamma avatangiisinut tunngasut soqutigisarigukkit isumaqarlutillu tamatta avatangiiserput paarilluarnerusariaqaripput. Oqaluttuaq nuannersoq pingaarutilimmik imalik.

## SAMBIKI SARU



ATUAKKIORTQ  
KIT A. RASMUSSEN

### SAMBIKI SARU

Kit A. Rasmussenip oqaluttuaaraliaa - Sambiki Saru- pissanganartoq sakkortulaarsinnaasorlu ilaqutariinnermut inupiluaraqatigiinnut ilaanermut, peqqarniisernermut tatinginassunermullu tunngasoq soqutigigukku atuassavat. Oqaluttuap imaraa ilaanni sianigisaqanngitsuusaarneq nipangiussiinnarnerlu pitsaaneruinnarsinnaasartoq. Kisianni aamma ilikkarsimasanit tamanit allaanerusumik aaliangertariaqalernermik imaqarpoq.

# NUNARSUARMI MEEQQAT ATUALERTIKKIT

Nunarsuarmi meeqqat tamarmik pitsaasumik ilinniagaqarnissamut piginnaatitaaffeqarput, namminneq nunamillu siunissaat pitsaanerussammat. Suli nunarsuarmi meeqqat 61 millionit atuartuungillat – taakku atuartunngortit-tariaqarput. Atuarfimmip pitsaasumi atuarnermik, allannermik kisitsinermillu aammali piginnaatitaaffimminnik eqeersimaarlutillu innuttaaqataanisamin-nut ilinniarfigisinnaasaminni atualernissaat pingaartuuvoq.

Nunarsuarmi siuttut nunarsuarmioqatigiit anguniagassaat 17-it atsioga-tigiiffiginikuuat, taakkunannga anguniagaq 4 imaqarpoq inuit tamarmik pitsaasumik ilinniagaqarnissaannik. Meeqqat tamarmik pitsaasumik atuarfe-qalerniassammata 2019-imi sapaatip akunnerani pisoqartitsiviusumi politi-kerit neriorsuutigisimasaannik eqqaasissavagut.

## Oqariartuutisi tusartissigut

Ukiq manna siunissamut takorluukkavut takutinniarlugit politikerit suaaru-teqarfigissavagut.

Illit nammineq qanoq iliuseqarnerlutit takutiguk. Imaluunniit politikerit aperikkat nunarsuarmioqatigiit anguniagaat 4 qanoq iliuseqarfigineraat.

Oqariartuutisi pullartaasanut allallugit suaarutigisigut. Oqaasinnaat, nag-gateqatigiiaat imaluunniit kajumissaarutiginiakkasi pullartaasanut allassi-git. Imaluunniit nunarsuarmi meerartatta siunissaat ajunngitsoq illit takor-luukkat qalipaaticissumik titartagaliariuk.

Nittartakkamiippat ilisserutissat, ilitsersuutit ilaaniarussilu iliuserisin-naasassinnut paasissutissat allat.

Ullormut pisoqartitsiviusumut akuugisi imaluunniit oqaatigerusutarsi pullartaasaliasilu Oxfam IBISimut nassiussigut **kingusinnerpaamik ulloq 10. april 2019** – taava ataatsimoortunngorlugit suliarissavagut politikerinullu anngunnissaat isumagalugu.

# AKTIONSSUGEN 2019

NUNARSUARMI  
MEEQQAT  
NIPAAT

POLITIKER-  
INUT  
OQARIAR-  
TUUT

Nunarsuarmioqatigiit  
anguniagaat pillugit  
iliuusikka, ilissi qanoq  
iliorpisi?



OQARIARTUUTISI UUNGA NASSIUSIGIT:  
OXFAM IBIS · VESTERBROGADE 2B  
1620 KØBENHAVN V · ATT: HELE VERDEN I SKOLE



[HELEVERDENISKOLE.DK/AKTIONSUGEN-2019](http://HELEVERDENISKOLE.DK/AKTIONSUGEN-2019)

# NUNARSUARMIOQATIGIIT ANGU- NIAGAAT PIVIUSUNNGORTIKKIT



Pilersaarutit ataatsimoorussagut FN-ip nunarsuarmioqatigiinnut anguniagarai. Taakku nunarsuup piujuaannartitsinermik tunaartaqarluni ineriartornissaa qulakkiissavaat. Nunarsuarmioqatigiinnut anguniakkat inunnut nunanullu tamanut atuupput – pisuunut piitsunullu. Anguniakkat annertugaluartut inuit tamarmik peqataappata 2030 nallertinnagu anguneqarsinnaapput.

Nittartakkamiipput assit, filmit, ilanngutassiat suliassallu nunarsuarmioqatigiit anguniagaannut 17-inut tunngasut. Ukioq manna nutaanik pinnguaatiliornikuuvugut nunarsuarmioqatigiit anguniagaat pillugit ilisimasaqarnerulissutaasinnaasunik unammissutaasinnaasunillu. Aamma tassaniippoq atuartitsinermut atortoq "Vores Verden – Ret til Fremtiden", tassani Danmarkimi nunarsuarmioqatigiit anguniagaat ilinniarsinnaavasi namminerlu ilissi taakku piviusunngortinnissaannut qanoq iliuuseqaqataasinnaallusi.



Nittartakkami anguniakkat 17-it qulequttanut sisamanut ataatsimoorinneqarput, 2030 nallertinnagu ajornartorsiutit qaangigassat ersarissitillugit: Piitsuussuseq naligiinnginnerlu, peqqinneq inuussutissallu, ilinniartitaaneq aamma nunarsuarmi naapertuiluarneq kiisalu avatangiisit pijuartitsinerlu.

**NUNARSUARMIOQATIGIIT ANGUNIAGAAT PILLUGIT  
PAASISAQARNERUSINNAAVUSI NITTARTAKKAMI UANI  
HELEVERDENISKOLE.DK/VERDENSMAALENE**

# Nunarsuarmioqatigiit Colombiamut anguniagaat



Ukioq manna nittartagaq sammisamik nutaamik peqalerpoq – ukiumi pineqartumi nuna ukkatarineqartoq pillugu nunarsuarmioqatigiit anguniagaannik imaqartoq. Nunarsuarmioqatigiit anguniagaanni immikkut Colombiamut pingaaruteqartut arfinillit toqqarpagut. Tassaapput piitsuussuseq, ilinniartitaaneq, niviarsiaqqat nukappiaqqallu naligiissitaanerak, naligiinnerusumik atugaqalernissaq, klimap illersorneqarnera eqqissinermillu suliaqarneq pillugit nunarsuarmioqatigiit anguniagaat 1, 4, 5, 10, 13 aamma 16.



## NUNARSUARMIOQATIGIIT ANGUNIAGAAT 1

Nunap inuisa imminnut sorsuunnerisa kingorna nunap aqqissuuteqqinnera sivisusarpoq. Colombiami inuppasuit suli piitsuullutik inuupput – nunaanarmi illoqarfiillu piitsoqarfiini. Nunap avannaata tungaaniittoq La Guajira piitsoqarfiit annerpaartaraat.

Tamanna ukiuni arlalinni panernersuaqarfiuvoq. Inuit tamarmik imermik amigaaqarput nunalu naatitsiffigissallugu panerpallaarluni. Taa-maammak inuussutissat naammanngillat. Tamaani najugallit piitsooqaat. Kaannerup imerusunnerullu kinguneranik inersimasut meeqqallu aqqusinerni nerisassanik imermillu qinuloortarput.

Nittartakkami Kasandra 14-inik ukiulik ullut tamaasa qinnuloortariaqartartoq takusinnaavarsi.



**NITTARTAKKAMI NUNARSUARMIOQATIGIIT COLOMBIAMIMI IMMIKKUT  
ANGUNIAGAAT ARFINILLIT PAASISAQARFIGINERUSINNAAVASI  
HELEVERDENISKOLE.DK/VERDENSMAALENE-I-COLOMBIA**



#### **NUNARSUARMIOQATIGIIT ANGUNIAGAAT 4**

Colombiami atuarneq akeqanngilaq. Taamaakkaluartooq meeqqat ilaat atuartuunngillat. Ilaqutariit ilaasa meeqqamik angerlarsimaffimmi ikiuunnissaat pisari-aqartippaat. Ilaqutariit ilaat atuarfimmi uniforminut, allattaavinnut atuakkanullu akissaqanngillat. Elkin

AtuaRaketimiittoq atuarnini ingerlatiinnarniarlugu illoqarfimmut anginerusumut nuussimavoq. Colombiami ilaqutariippassuarnut atugassari-taasut taamaapput.

**Nittartakkami Yuseth atuarfialu immikkuullarissiq pillugu paasisaqarnerusinnaavusi.**



#### **NUNARSUARMIOQATIGIIT ANGUNIAGAAT 5**

Amerika Kujallermiut oqaasiini taaguutit ilagaat machismo, isumaqartoq ilaqutariinni angutip akisu-saaffik aneq tigummigaa. Taamaammat angutip arnanut meeqqanullu naalagaasaqaat. Kinguaariit ingerlaneranni taamaassimapput – aamma Colom-

biami. Taamatut kultureqarneq allangortittariaqarpoq arnat naligiis-sitaalerniassammata aamma nivarsiaqqat nukappiaqqatulli periarfis-saqalerniassammata.

**Nittartakkami Lina FARC-imi sakkutuujusimasooq paasisaqarfigisinnaavarsi aamma qanoq naligiissitaanermut tunngasunik misigisaqarsimanersoq.**



#### **NUNARSUARMIOQATIGIIT ANGUNIAGAAT 10**

Colombiami naligiinnginneq annertoqaaq. Pisuut piitsullu nikinganerat nunap annersaani ersareqaaq. Illoqarfiit pingaarnersaanni Bogotámi naligiinngin-neq ersareqaaq. Piitsoqarfiunerpaap qanittuaniipput najugaqarfiit kusanartut akisuullu. Ungaloqarput

paarsisunillu pigaartoqarlutik. Atukkatigut naligiinnginneq annertoq aamma meeqqat inuusuttullu ilinniaqqinnissamik periarfissaannut sun-niuteqarpoq.

**Nittartakkami Colombiami naligiinnginnerujussuaq pillugu paasisaqarnerusinnaavusi.**



#### **NUNARSUARMIOQATIGIIT ANGUNIAGAAT 13**

Colombiami aamaruutissanik tunisassiorneq klima-mut avatangiisinullu kinguneri ajornartorsior-titsi-simaqaat. Aamaarutissap nukissiutigineqarnera avatangiisinut ajoqusiisaqaq. Nunarsuarmi aama-arutissarsiorfiit annerpaat ilaat Cerrejónimiippoq.

Colombiap avannaatungaani. Tamaani inuit mingutsitsinerup kingunera malugaat. Nunami naatitsineq ajornakusooqaaq, minguitsumik imis-saqanngillat, kuuit mingutsitaapput, inuit napparsimalertarput ilaquta-riippassuillu nuuttariaqarsimallutik.

**Nittartakkami Jennifer naggueqatigiillu wayuu aamaarutissar-siorfimmu akiunnerat pillugu paasisaqarnerusinnaavusi.**



#### **NUNARSUARMIOQATIGIIT ANGUNIAGAAT 16**

Ukiut 50-it innuttaasut imminnut sorsuutereersut Colombiami eqqissineq anguneqariartuaarpoq. Eqqissinissamik isumaqatigiissut 2016-imi atsiorne-qartoq alloriarnerusimavoq annertoq. Taamaakka-luartoq suli ilaqutariit amerlasuut suli toqqissisima-

nartumik inuuneqanngillat. Pinerluttuliornerit peqqarniisaarnerillu suli inuppassuarnut ulluinnarsiutaapput. Innuttaasut sorsuussimanerisa kinguneri suli ersinngitsukkut atuupput. Demokratiip atuutseqqilernis-saa sivisusinnaavoq.

**Nittartakkami Yeini Colombiami peqqarniisaarnermik misigisaqar-simasooq pillugu paasisaqarnerusinnaavusi.**





**KEILER  
STIVEN**

# Anaanaga sakkutuujunikuuvoq

**STINE BANG** **ANDREAS BECK**

Kiattup orpippassui eqimasorujussuummata seqernup qinngornerisa nuna sukut tamaana angusarpaat. Timmissat orpinni qarlorpalaarput, soorlu aamma taamaassimasut Jennie siullermeerluni tamaanaaqqummat.

Ilanilu aqqusineeqqakkoorput. Aallaammik nammappoq uniforme qar-lunilu. Qoqassiisarlutik sorsuuttartut sakkutuuinut ilannguteqqaarami pulateriaarsunnik naammattuuinissani ersigisarnikuusani maanna an-nilaangagiunnaarnikuuaa. Taamani 12-inik ukioqarpoq. Maanna 19-inik ukioqarpoq pisunnerlu qasunariartuaarlugu. Qaammatit qulingiluassaa naartuvoq. Quiliivittutut misigigami ilani utaqqeqqullugit unitsippai. Quilingilarli, ernisulersoruna.

Nalungilaat naalackersuisut sakkutuuisa nakkutilliisut ilaat tamaani qanittumiittut. Takuneqarunik akersuuttariaqassapput. Ilaasa Jennie qimallugu ingerlaannarput. Orpippassuit qeqqanni sullernit nipiliortut timmiaaqqallu qarlorpaluttuaannartut akornannut qimataavoq. Nakor-saq, napparsimasunik paarsisoq paarsisuusussallu sisamat ilagaat. Nakkutigineqarluarluni ernisulerpoq.

Pitsianngitsoq nukappiarannguaq inequnarluinnartoq inunngorpoq. Pakkuppaa, kunillugu milutsilerlugulu. Ingerlaqqittariaqarpulli. Suli naalackersuisut sakkutuui qanittumiipput. Nukappiaraq isussuffigaa: "Keiler Stivenimik ateqarputit." Sakkutuut ilullianut poortuuteriarlugu nikuippoq pisullutillu aallaqqillutik. Akunnialuit qaangiuttut aqullaarluni uppippoq. Ilaasa kivippaat ernalu ilanngullugu akiummut ikeriarlu-git orpippassuarniit anillaappaat nunaateqarfimmukaallugillu tassani nukittorsarlutillu isumannaatsumiinniassammata.

Qaammatit pingasut ingerlareermata sakkutooqataasa Jennie aallugu takkuppet. Keilerip qimannissaanut piffissanngorpoq. Orpippassuarni sakkutuut akornanni meeraaraq ilaasinnaangilaq.

### Anaanaqarnani inuuneq

Keiler Stiven Colombiami meerarpassuit assigalugit angajoqqaani ilaginagit peroriartorpoq. Arnaa Jennie 12-inik ukioqarluni sakkutuunut ilannguppoq. Ilaqutai piitsooqaat, angutaa imerpallaarpoq Jenniemullu pitsaasuunani. Illoqarfigisakumini sakkutuut orpippassuarneersut naapillattaasarpai, taakku Jenniemut pitsaasuupput. Taamaammat aallaqatiginikuuai. Taakku ilaquuttamisut isigilerpai. Kommandøri, sakkutooqatigiit aqutsisuat, Jenniep ataatatut isigilerpaa.

Keiler arnaata qimammagu aanaata tiguua. Colombiap illoqarfiisa pingaarnersaanni Bogotáni marluullutik najugaqarput. Keilerip nalunikuuaa kina anaanaginerlugu. Qimataasimasutut misigisimasarpoq eqqarsaatigisarlugulu soq aanami anaanani pillugu oqaluttuuttannginneraani. Immaqaana toqusimasoq? Keiler eqqarsaateqartaqaaq. Ilaanneeriarluni arnaata pulaartarpai. Aanaatali oqaluttuutinngisaannarpaa sugineraa. Ukiuni arlalinni Keiler isumaqarsimagaluarpoq ikinngutit ilagiinnaraat.

Keiler aatsaat 7-inik ukioqalermat aanaata oqaluttuuppa arnaq ilaanneeriarluni takkuttartoq anaanagigaa.



Keiler 11-nik ukioqarpoq 5.klassimi atuartuulluni. Arnaata ilinniagasaanik ikiorpaa. Arnaata aamma orpippassuarniikkallarami atuarsimanggisani ilinniarlugit atuartuuvuq. Maanna ilinniarnertuutut sorarummeernissani ilungersuutigaa.

“Naak anaanaqarlunga paasereeraluarlugu suli qimataasimasutut misigisimasarnikuuvunga,” Keiler oqaluttuarpoq. Jennie sivikitsumik pulaartarsimavoq orpippassualiaqqittarlunilu.

### Eqqissineq

Ukiut 50-it sinnerlugit innuttaasut sorsuutereersut Colombiami naalackersuisuit pikitsitsisullu FARC eqqisseqatigiinnissamik isumaqatigiissuteqarput. Qoqassiillutik saassussisartut sakkutuui orpippassuarniikkunnaarput sakkutillu tunniullugit. Aamma Jennie. Orpippassuarniikkunnaarnerminiit piffissami siullermi Keilerilu oqarasuaatikkut oqaluuttarput, taamaalillutillu imminnut ilinniarlutik.

Qaammatit sisamat qaangiummata kiisami Keilerip anaanani najugaqatigilerpaa. “Naapikkatta oqaasituaraara – anaana – sivisuumik pakku-

### GUERILLA SPANIAMIUT OQAASERAAT TAANEQARTARTOQ: KE-RILJA

Qoqassisarluni sorsunneq – guerillakrig – sorsori-aasiuvoq. Sakkutuut pikitsitsisut eqimattakkaarlutik naalackersuisut sakkutuuinut saassussisarlutik sorsuunneq ajugaaffiginiartarpaat. Pikitsitsisut sorsunnermi nalinginnaasumit amerlatigisunik sakkutooqarneq ajorput. Taamaattumik isertorlutik saassusseriarlutik qaqqanut orpippassuarnullu toqqoqqittarput.





## FARC

Colombiami pikitsitsisut FARC naalakkersuisut sakkutuuinut ukiut 50-it sinnerlugit akiupput. FARC-ip sorsuutiginiakuuaa nunaatillit piitsut naatitsisinissamut nunamillu pigisaqarnissamut piginnaatitaaffeqalernissaat. Colombiami pisuut ikittuararsuit nuna naatitsivissaq tamaat pigaat. FARC-ip sakkussanik pisinissamut akissaqalerniarluni inunnik aallarussisarneq ikiaroonartunillu tuniniaaneq aningaasarsiutiginikuuai. Taamaamat Colombiami inuppasuit FARC kamaattorujussuaat, naak aamma isumaqaralarlutik nunami atukkatigut nali-giinnginneq annertoorujussuusoq.



taarpugut. Pakkunneq asanninnermik ulikkaartoq. Immitsinnut nassaaraluta pilluangaaratta qivavugut.”

Maanna Keiler anaananilu sakkutuujusimasunut meeraannullu najugaqarfissiamiipput. Tamaani ukiup affaa najugaqarsimalerput. Illunguaqarput marlunnik initalimmik. Najugaqarfimmi anaananilu atuar-sinnaapput, Keiler ikinngutitaartorsimavoq.

Inersimasut sakkutuujunatik inuunissartik ilikkariartorpaat, sulili sakkutuutut inuunerminni ileqqumik ilaat nassataraat. Soorlu suli kater-sortarfigisaminni tamarmiullutik ataatsikkut nerisarput. Ullaakkut, ullup qeqqanut unnukkullu.

“Aanaanagalu ataatsimooqqileratta uannut anaannullu susoqarsimanersoq sivilisuumik oqallisigisarparput. Maanna najugaqatigiippugut avissaaqqanitsinnilu annaasimasagut immersorniarsaralugit,” Keiler qungujulluni oqarpoq.

Aqaguani anaanat ullorisussaavaat. Keilerip ikinngutaasa ilaat put-tuppoq aggilernersorlu aperaluni. Meeqqat tamarmik anaanaminnut takutitassaminnik qitinnermik sungiusartussaapput. Keileirip anaanani aalateriffigaa arpaannarlu ingerlalluni.



## HELEVERDENISKOLE.DK/KEILER-STIVEN

FARC eqqissinissamillu suliap ingerlanera aamma arnat FARC-imi akiuteqataasimasut ilaat pillugit paasisaqarnerusinnaavusi. Colombiami naapertuilluarneq eqqissinerlu pillugit Nunarsuarmioqatigiit anguniagaat 16 aamma paasisaqarfiginerusinnaavarsi.





**YUETH**

# Yuseth mattusaaqanikuvoq

**HEIDI BREHM** **ANDREAS BECK OG HEIDI BREHM**

Tumerparpaat oqallippaluttullu nipaata qalleraatiinnarput. Ilaqutariit eqqaamiuilu illup silataani oqallipput. Yuseth illuaqqaminni piareersimavoq. Qaammat ataaseq arnatut inuulernissaminut piareersarneqarluni illuminni mattusaaqqasimavoq. Matumit anillakkuni meeraanini qimassavaa inersimasullu silarsuaannut tikilluaqqusaassalluni. Silataani inersimasutut anillannissaa utaqqerrappaat.

Yusethip illortik ukiut pingasut matuma siorna qanoq innersoq kingumut eqqaasarpaa. Mattusaaqqasimanini eqqaamalluangaaramiuk soorlu tassa ippassaq pisimasoq.

## Aallarnek

Yuseth 15-inik ukioqarpoq. Marlunnik kinguliaqarpoq: Hernandez – kinguliaq nalinginnaasooq aamma Puana – naggueqatigiit Wayuut atiat. Kinguliaata – Puanap – takutippaa naggueqatigiinni wayuuni ilaquitariissuarnut sorlernut ilaanersoq. Colombiap avannarpasissuani nunap immikkoortuanit Alta Guajirameersuuvoq. Nunap immikkoortua tamanna piitsuunerpaanut ilaavoq. Aqqusineqarpiangilaq illoqarfeeqqallu siamasillutik. Illoqarfeeqqat ilaannai atuarfeqarput. Avinngarusimasuunerat peqqutaalluni ilaqutariit amerlasuut meeqqatik atuarfimmi najugaqartittarpaat. Yuseth atuarfimmini ukiut sisamassa at najugaqarpoq. Angajoqqaavi qatanngutaalu sisamat illoqarfeeqqami akunnerit marluk biilerluni tikinneqarsinnaasumi najugaqarput. Yuseth feeriani, qaqutigullu sapaatit akunnerisa naaneranni taamaallaat angerlartarpoq.

Yuseth atuarfimmi pikkorinnerpaanut ilaavoq. Atuartitsissutini tamangajanni qaffasissumik angusaqartarpoq. Taamaammat aamma ikiortitut toqqarneqarsimavoq. Tamanna Yusethip tulluussimaaruti-



gaa. Ilinniartitsisut meeqqallu nukarliit ilinniagassaannik ikiortarpai. Aliasukkaangamik ilaqtuttatilluunniit maqaasigaangamikkitt Yusethimukartarput. Tuppallersaallaqqissuuvoq, suut qissatiginaaat puiortillugit oqaluttuutarpai.

## El Encierro

Naggueqatigiit wayuut ileqqutoqaraat meeraanermiit inersimasumut ikaarsaarnermik malunnartitsisarneq. Nukappiaqqap nipini allanngorpat angutitut pissusilersortariaqalertarpoq. Niviarsiaaraq aqartalerpat "El Encierro" aallartittarpoq isumaqartoq mattussaaneq.

Yuseth 12-inik ukioqarluni aaqalerpoq. Illuminni qaammat ataaseq mattussaavoq. Qaammammi tassani arnaata aanaatalu kisimik takusinnaavaat. Naggueqatigiinni wayuuni anaanaasup aanaajusullu pisussaaffigaat niviarsiaqqat inuusuttut inersimasutut inuunermik ilinniartinnissaat. Yusethip arnaata aanaatalu arnatut qanoq pissusilersussanersoq oqaluttuuppaat. "Arnat pequernatillu pinnguartassanngillat," arnaa oqarpoq.



Atuartut tamangajaavimmik naggueqatigiinnit wayuuneersuupput. Atuartitsineq tamangajammi spaniamiut oqaasii atorlugit ingerlanneqartarpoq. Naggueqatigiit wayuut ileqqi aamma ilinniartarpaat. Niviarsiaqqat tamarmik nissikullattakkanik pooqattalioneq nivinngartakkanillu siniffiliorneq ilinniartarpaat.



Atuarfimmi nukappiaqqat 75-it niviarsiaqqallu 105-it najugaqarput. Atuartut sisamanut makittarput, siniffitik nivingasut poortuutarpaat ermillutillu. Ullaakkorsiunnginnerminni atuarfik eqqartarpaat.



Mattussaaqqanerup aamma isumagaa arnatut inuulernissamut timip piareersarnera. Arnap wayuup timini paarilluartussaavaa meeqqiorluarniarumaarami uitaariumaakkaminullu pinnerniassagami. Mattussaaqqanermini sapaatip akunnera siulleq Yuseth siniffimmi nivingasumi nalavoq. Perusuersartarfialaleraangami aatsaat nikissinnaatitavoq. Kiaqaaq Yusethilu eqqarsaateqaaq. Inuunermi qanoq allanngortariaqarnissaa eqqarsaatigaa, inuit tamarmik arnatut ileqqoqalernissaa naatsorsuutigippassuk taava ikinngutini illakuloqatigalugillu pinnguaqatigisinnaajunnaassanerpai? Apeqquterpassuit kisimi eqqarsaatigiinnartariaqarpai. "Uummatinniiginnarput," Yuseth oqaluttuarpoq.

Qaammatip ataatsip missaa mattussaaqqanermini Yuseth nerisaqarpallaanngilaq. Piffissap annersaa chichi kisiat imigarisariaqarpaa majsinit



Atuarfimmi imeq kuugin-nartuunngilaq. Ullut tamaasa ualikkut atuar-tut qattalerlutik imiisi-vimmut imertartarput. Ulikkaarlugu immeriar-lugu atuarfiliaattarpaat aqaguani ullaakkut atoriaannangorlugu.

savaasallu immuanik sanaaq. Kaaginnavilluni sakkortoqaaq. Naasut atorlugit imeruusaasiamik aamma pivoq. Imeruusaasiamik imerami meriarpoq – meeraanera iluaniittoq anillanniassammat. Nujaalu tuii tikillugit kipineqarlutik – meeraanera timaaniittoq peerniassammat.

Mattusimaneqarnermini unnuk kingulleq imermut nillertumut uffar-neqarpoq. Erngup nillertup timaani minguit kingullit piissavai. Illumiit aninissaminut qilanaaqaaq. Silaannarissumut anillannissani qilanaa-reqaa. Suli matu ammannngikkaat tumerparpaat tusaalerpai. Yusesthip nalunngilaa matumiit anillakkuni inuunini allanngorsimassasoq.

### Ikinngutiginerpaasaq

Daryibel atuarfimmi Yusesthip ikinngutiginerpaasaraa. Daryibel aamma wayuuvoq. Yusesthimut assut tapersersortaavoq. Ikinngutigiiit taakku pif-fissaq mattusaaqaffitsik oqallisigisarpaat. Yusesthip aaqaleqqaarneraniit ukiut pingasut qaangiukkaluartut sulii illuminni mattusaaqqasimaneera eqqarsaataani initoqaaq. Daryibel paasinnittarami oqaloqatigiuminartuu-voq. Yusesthip Daryibelillu inersimasutut pisassat inerteqqutillu oqallisigisarpaat. Naak sulii pequerneq illakulunnerlu atoraluarlugit inersimasu-tut pissusereqqusaasut sungiukkiartorpaat.



### HELEVERDENISKOLE.DK/YUSETH

Yusesthip atuarfia alakkarsinnaavarsi Colombiamiluu nunap inoqqaavi wayuullu ileqqui ilinniarlugit. Nunarsuarmioqatigiit anguniagaat 4 aamma 5 ilin-niartitaanermut aamma Colombiami arnat angutillu naligiissitaanerannut tunngasut ilinniarsinnaavasi.





**JULIAN**

# Nipilersoqatigiit inupiluaraqatigiilluunniit?

 HEIDI BREHM  ANDREAS BECK

Illoqarfimmi aqqusernit angallaaffioqisut ungasilliarlorlugit biilit qummut ingerlapput. Orpiit portusuut aqqusernup sinaaniipput. Biili isertarfiup angisuup saanut unippoq. Julian angerlamut apuuppoq. Siullermik najugaqarfigisimasaminut anaanani pulaaqqammerpaa. Maanna atuarfimmut avatangiisinullu toqqissisimanartunut tikiuteqqippoq.

Julian 12-inik ukioqarpoq. Bogotámi illoqarfiup immikkoortuani peqqar-niiserfioqisumi pinerluttuliorfioqisumilu najugaqarnikuuvoq. Tamaani anaanani najugaqatiginikuuaa. Julian suli mikeqisoq ataataata ilaqutariit qimassimavai. Julianip arnaata suut tamaasa isumagisariaqalersimavai. Taamaammat arnaanut Julianimik pilersuisuunissaq sapernarsimavoq. Julian imminut isumagisariaqatarsimavoq. “Kisimiit-tuaannarpunga. Anaanaga ilungersoraluaqisoq kaattarpunga,” Julian ukisiitigaluni oqarpoq. Qaammatit pingasut siornatigut Julian nukap-piaqqanit angajullernit saassutsissimavoq. Taamaattoqarmat arnaa iliuuseqarpoq. Tusarnikuusimavaa atuarfik meeqqanik inuusuttuaqqan-illu inupiluaraqatigiinnit pinerluttuliortartunit ikiarooratulerisartunillu ilanngutsitaanissaminnik ulorinartorsiortunik ikiuisartog. Qujanartumik Julian tassani inissaqarsimavoq.

## Annilaangasarnini qaangersimavaa

“Én, to – én, to, tre.” nipilersoqatigiit appipput. Ungasissumiit tumerparpaarpaluk tusaaneqarsinnaavoq. Ualivoq, tamanna Juliannimut isumaqarpoq nipilersornissamut piffissanngortoq. Atuarfimmi meerarpas-suit assigalugit tumerparpaartarpoq. Nipilersoqatigiinnut tulluarsarlugu tumerparpaat akuttoqatigiissaarnerat nakkutigisariaqarvaa. Tamaavim-mik - atuartut tamarmik tumerparpaallu - ataatsikkut iluatsikkaangata nuannertaqaaq. Julianip ukioqatini sunngiffimmi nuannersumik sam-misaqatigisarnerat aatsaat pernaammik misigisalerpaa.

Julian atuarfigisaminut pingikkallarmat pissutsit allaaneroqaat. Atuarfimmiit angerlaraangami eqqaminni aqqusinerni angalaalertarpoq. Meeqqat angajullit amerlanerit pissusaat nuanniittarpoq. Ikiarortarput sakkooqartarlutillu. Aamma Julian ikiarortinniarlugu ussersimagaluarpaat, sakkunillu "qaqortunik" pingitsaalillugu nassartittarsimallugu. Sakkut "qaqortut" tassaapput saviit allallu kilertitsisinnaasut. "Tamakkuuteqarneq taamaattussaannartut isigineqarpoq. Tamarmik tamaatartarput," Julian oqaluttuarpoq. Nukappiaqqat eqqaamiuni ilagalugit Julian naatsiiviliarsuarmittarpoq. Nukappiaqqat tamaaneerujoortarput. Ilaat aningaasannanniarsarisut ilaat aningaasanik tillinniarisarisut. Ilaat allamik susassaqqannginnamik tamaanerusaaginnartut. Julian tatigisaqqanngilaq, aamma nukappiaqqat allat qanoq ilioriasaarsinnaaneri naatsorsorneq ajornartaqaaq.

Atuarfimmi nipilersoqatigiinnut ilaanermit allaanerussusaa annertoqaaq. Naatsiiviliarsuarmit kisimiittarpoq imminullu paaraluni. Nipiler-

**Atuarfik inuiaqatigiinni ingerlaatsit assigalugit ingerlavoq. Atuartut tamat oqartussaaqataanerat aamma ataatsimut aalajangigassanik suliaqarneq ilinniartarpaat. Ukiut tamaasa atuartoq ataaseq borgmesteritut qinerneqartarpoq.**



**Juliannip atuarfia Bogotámi qaqqap sivingarnaniippoq. Atuarfik illoqarfimmut isikkiveqarpoq. Naatsiiveeraqarpoq atuartut naatitanik naatit-sivigisartagaannik. Naatitat atuarfimmi nerisassianut atorneqartarput.**

soqatigiinni suneqariataarsinnaanini annilaangaginagu avatangiisini allat puorlugit akuttoqatigiissaarinissani kisiat eqqarsaatigisinnavaa.

### **Silarsuaq nutaaq**

Atuarfimmiit Colombiami illoqarfiit pingaarnersaat Bogotá isiginnaarneqarsinnaavoq. Illorpassuit, ulapputtut angallattullu. Inuuneq taamaattoq Juliannip peqataaffiunnaarnikuuaa. Atuarfik qorsooqqisumi nipaatsumiippoq. Nipaassuup qeqqani hesti ingerlarujoorpoq Juliannillu ikinngutai marluk naatsiivileripput.

Julian atuarfimmi ikinngutitaartorpoq, taakku ilagaat nivarsiaraq Yeini. Taanna 13-inik ukioqarpoq Colombiamilu nunap ilaanit allameersuulluni. Yeini Juliannituut atuartullu allat assigalugit imaannaangitsunik aqqusaagaqarnikuuvoq.

Julian Yeinilu atuarfimmi nutaajupput. Ikiqatigiillutik suna tamaat ilinniarpaat. Atuarfimmut pingikkallaramik inuunerinikuusartik oqallisigerpiarneq ajorpaat. Nalunngilaat atuartut tamarmik sakkortuumik inuuneqarnikuusut. "Kisimiinnani nuanneqaaq. Oqaaseqarpallaangik-



Atuarfimmi atuartut inersuarni sinittarfiusuni sinittarput. Niviarsiaqqat nukappiaqqallu immikkut. Sinittarfiit atuartumit ataatsimit akisussaaffigineqartarput eqqissisima-soqarnissaanik torersuunissaanillu nakkutilliisuusumik. Atuartut tamarmik sinifeqarput skaaviullu affaa pigisaminnut atisaminnullu atorsinnaallugu.

kaluarluni paasinnissinnaasut akornanniilluni nuanneqaaq,” Juliannip qungujulluni Yeini isigiitigalugu oqaluttuarpoq.

Juliannip atuarfimmi najugaqarnini nuannaraa. Toqqissisimanarpoq. “Allaanngilaq silarsuarmut allarluinnarmut pilluni. Siullermik artaannik iliuuseqariasaarsinnaanera annilaangagisarpara. Kamaassisarponga allanullu ajortuliortarlunga. Taamaanneq taamaattusnaanartut isigineqarmat,” Juliannip talini siaajutigalugit oqarpoq. Naak Julian qaammata-ni pingasuinnarni atuarfimmiikkaluarluni allanngorsimavoq. Kamaanneq aqqutiginnikkaluarlugu aporfinnik qaangiisnaaneq ilikkarnikuuaa. Pingaarnerusumillu nammineq misigisalerpaa allanit isumagineqarneq qanoq nuannertigisoq, allanullu ikiuussinnaanerup nuannissusaa.

### Colombiamut neriuut

Juliannip takorlooruminaatsippaa Colombiami qanoq ililluni eqqissisoqarumaarnersoq. “Annilaangajuaannaraanni inuttut pitsaasuunissaq ajornaatsuinnaanngilaq. Annilaanganerup inuk sianiillortittarpaa. Neriuutigaaara Colombiami eqqissineqavikkumaartoq,” oqarpoq.

Julian Yeinilu isumaqarput Colombiamut atuarfimmi inooriaaseq assut ilikkagaqarfigisinnaagaat. Tamarmik ikioqatigiittarput imminnullu isumagisarlutik, tamarmillu naligiillutik. “Takorlooriarsiuk siunissami Colombiap taamaalisinnaanera,” Julian eqqarsarpasilluni oqarpoq.



### HELEVERDENISKOLE.DK/JULIAN

Juliannip atuarfia alakkarsinnaavarsi, Yeinip oqaluttuaa tusarnaarsinnaavarsi aamma Bogotámi inupilluaraqatigiit pinerlunnerillu pillugit paasisaqarnerusinnaavusi. Nunarsuarmioqatigiit ilinniagaqarneq aamma Colombiami eqqissinissaq pillugu anguniagaat 4 aamma 16 ilinniarsinnaavasi.





# Sambiki Saru

 KIT A. RASMUSSEN  INGE RAND

**A**qqusinermi qanngorujussuarpallannerup timera tamaat aalariartippaa. Uummatiga kassuttipilussuugaluartoq nalaasaarfimmi innangaannarpunga. Igalaat saaguisa avissaangalaarnerisigut ikittaartut qissigigaluarlugit tv kisiat nakkuppara. Biilerpalussuaq, nipilersuutaat assut basseqarpaluttoq. Allaasinnaanngillat Mizarukkut. Eqqatsinni susoqaraangat inupiloqatigiit Mizaru akuujuaannarput. Sulerisimanersut naluara aamma paaserusunngilara.

Ilisimasaqarnani pitsaannerusarpoq.

Nalunaaqutaq qiviarpara, qulinngorpoq, sulilu Johan angerlarnani. Quttoqqakka inussannik pattappakka, naammita angajora? Kiisa unammisut naammassilerput, aali isiginnaaqatigiinniarluta isumaqatigiinnikuusugut.

“Angerlalerpit?” Allaffigaara. Issariarnerit arlallit akinissaa utaqqigaluarpara.

Imminut uppertinniarsarigaluarpunga qanngorpallak ikittaartullu Johanimut attuumassuteqanngitsut.

Johanip imminut paarinissamik ilinniartinnikuuaanga. Arlaannik takusaqaruit alaruk allamullu ingerlaqqiinnarlutit. Nilliarpalummik tusaasaqaruit, tusaanngitsuusaaruk allamukapallallutillu. Ilisimasaqanngikkuit oqaatillisinnaanngilatit.

Sianigineqanngikkuit suneqarnaviannilatit.

Mobiler qiviarpara, suli akisimannigilaq. Tv qiviarpara, taakku unammisut Johanilu isiginnaartaraluarpagut.

Tv-p aquutaa tiguara kanalimullu allamut nuullugu. Nooqattaarlugu aallartikkaluarlugu ilisarnartumik takusaqarpunga.

Illu ilanngutassiorput tunuaniittoq. Silaterpiatsinniingikkaluarluni aqqusernup tullianiippoq.

Arnaq aappaluttumik kavaajalik aqqusinermi tarrajuttumi mikrofoni tigullugu oqaluppoq.

“... inupiloqatigiit Mizaru maani eqqisiviillortitsisartuusut,” oqarpoq. Nujani anorimit aalasut kiinnaminit illuartitigalugit.

Iglaaat qiviarpakka, massakkorpiaq takananiinnerpoq?

Biilit sukkalisaaqalutik nipituumillu nipilersorlutik tunoqquppaat. Tupappaseqaluni qiviarpai illuarlunilu. Assami aappaanik sakissani attoriarlugu sequnngilaariarluni aallakaatitsissummut qiviaqqippoq.

“Soorlu oqaatigileralariga, illoqarfiup immikkoortuani maani inupiloqatigiinnut ilaasortat arlaqarput. Maani eqqisiviillortarnerit amerlaqimmata polititit qatserisartullu maangarnissartik kajumerineq ajoraluarpaat.”

Arnaq uerujussuarluni allamut qjssimippoq. Isumaqaraluarpunga biilit suli qaninnerullutik saneqquttut nueqqissasut. Arnarli qiviaqqippoq nangillunilu:

“Inupiloqatigiit ikiaroorartuarni arnermut, pinngitsaaliilluni akiliisiti arnermut tillinni arnermullu tusaamasaasut maanna aamma persuttaallutik saassussisimasutut pasineqarput.”

Persuttaasut – ataasiarlutik?

Tv-mi arnap ilanngutassiisup tunua-tungaa nakkuppara. Johan tassuunaqquttussaagaluarpoq, kisiannimi takugusimaguniuk allakkut ingerlajartorsimassaaq. Immaqamiuna taamaamat kingusinaartoq?

Tv-mi arnaq suli oqaluppoq:

“Politiit aatsaat nakkutilliilluni filmiliutikkut immiunneqarsimasoq saqqummiuteqqammerpaat.” Arnaq unilluni utaqqigaluarpoq, kisianni videomik saqqummertoqanngilaq. “Videomi angutit marluk baseballbatsimik ruujorinillu saviminermik anaatarneqarlutik saassunneqartut takuneqarsinnaapput. Pinerlineqartut suli inuunermi ulorianartorsiorput.” Suli videoliaq saqqumminngilaq.

“Saassussinermut suna peqqutaasimanersoq ilisimaneqanngilaq,” arnaq aappaluttumik kavaajalik oqarpoq. “Tusatsiakkalli malillugit inupiloqatigiit akiniaasartoqarnerarpaat. Naluarpulli ullumikkut akiniaallutik saassussisimappata suna tamatumunnga peqqutaasimanersoq.”

Talikka nillertuinnaapput, mobilera tiguara. Johanip nalunaarutigini kuusaa kingulleq nakkuppara.

“Kingusinaalaassaanga,” allassimavoq, akunnerilli arlallit qaangiutereerput.

Nuaga eerialuarakku toqqusaakka paningaarmata allaanngilaq arlaannik kinertumik iiserialuuartunga. Assakka sajuttut ataatama normua attavigisartakkanni nassaaraara, toorlugulu. Tigugalaruniummi aamma susinnaanngilaq. Immaqami oqarasuaallunniit tigusinnaanngilaa. Tusaasinnaaguniummi, ilami oqarasuaateqarnerlunilunniit eqqaamasinnaaguniuk.

“Videop aallartinnissaa piareerpassippoq,” arnaq pissangarpasilluni qungujuusalluni oqarpoq, tunummut qjssimillunilu tv-kkut nuisajunnaarpoq.

Video qalipaateqanngitsoq ersernerluppoq. Angutit marluk filmiliut tunullugu pisupput. Aappaa naakullalik aappaalu teqqialilik.

Nalaasaarfimmut ingilluarpunga, tamarmik Johaniunngillat.

Video ingerlaqqippoq, angutit inuusuttut pingasut nuipput. Tamarmik nasartalinnik tujuuloqarput. Nasarluarsimagamik kiinaat nuisanngillat. Taamaakkaluartoq saarlerpaaq ilisaraara. Ukiunik marlussunnik Johaniimiik angajulliuvoq, ungasinngisatsinni najugaqarpoq Mizarukkunnullu naalagaalluni.

Baseballbatseq tiggummiani angutinit marlunnit takuneqarsinnaajunnaarlugu tunuminut toqqorsimavaa. Ilani tunumut qiviarpai angutillu saallugit piareerluni.

Pisut sukkasoorujussuanngorput. Angut teqqialik pukusuatigut baseballbatsimik anaaneqarpoq. Inuusuttut marluk ilannguteriasaarput ruujorinillu saviminernik anaalerilerlutik. Baseballbatsimik ruujorinillu angutit anaalerpaat. Angutit uppipput.

Johan oqartarpoq Mizarukkut qanillissanngilluinnarikka, taakkunanit takuneqaruma qimaqqissinnaajunnaassagikka. Inupiloqatigiit parnaarussivillu qimaqqinnaviannngikkikka. Tassami parnaarussivimmut pitinnani ilivermiilereersimannngikkaanni. Johanillunniimmi qanillerusunngilai, aatsaat toqunneqariaannaalluni paasigaluaruniuk Mizarukkut ornissinnaanerarpai. Taamaakkaluarpallunniit



ornikkusunnginnerussagaluarlugit. Iliuserisartagaat ajortuummata inerteqqutaallutillu.

Gormitoqaq nr. 5-imiittoq oqartarpoq qunugisaqarnani, ingammik inupilunnik inupiloqatigiinneersunik. Suneqanngikkunilu sujunnarnagit. Taamaakkaluartoq igalaava aserorneqarpoq.

Politiit takkupput, naak tigusaasoqanngikkaluartoq inuit tamarmik nalunngilaat oqaatiginnissimassoq.

Tulliani igalaaq aserorneqarnani Gormitoqqap seeqqi 'aserorneqarput'.

Tv-mi takusinnaavakka angutit marluk nunami aalariassanatik nalasut, Mizarumilu naalagaasup ilartik tuiisigut pattalaaraa nuisavoq. Taamaalisorlu pattalaarneqartoq videoliummut qiviarpog.

Video unitsippaat qanillisillugulu. Nutsat qaamasut, qingaq qummuulaartoq siggullu silittut.

Johan.

"Politiit susoqarsimaneramik paasiniaanerminni ikiortissarsiorput, minnerunngitsumik saassussisut kikkunerisa paasiniarnissaannut. Paasissutissaateqaruit qinnuigineqarputit sianeqqullutit normumut ..."

Normu ilisaraara. Atuarfimmit angerlaraangama normu taanna takujuaannarpara.

Qaammatit arlallit matuma siorna viceværti isaarissap eqqaaani plakatimik nivinngaanikuuvoq. Assitaraa politeeq pitsaarpasissog, allagartaqarpoq:

"Uannut sianeruit annilaangassutissaqanngilatit," oqarasuaatillu normua.

Maani ajortunik pisoqartangaarmat isaarissat tamaasa platinik nivinngaassuiffigisimavaat. Kisianni ilimanangilaq sianertut amerlisimanissaat, plakatimmi tuschimik qernertumik allattuiffigineqarsimapput:

"Oqaatilliigaluaruit pisassat pissavat - utaqqilaarit!!!"

Politiillu assinga Hitleritut umilerneqarsimalluni.

Kiinara tagiarpara, immaqaana takunerlukkiga, immaqa Johanniunngilaq. Tv-mili assitaa tarrereeraluortoq, arnaq aappalut-tumik kavaajalik taakani aqqusinermiikkunnaareeraluortoq, sulisigi-sutut ippara. Nujai, qingaa qungujunneralu – tassa tamarmi Johan.





Johan angutinik marlunnik unataanermi peqataasoq. Ruujorimik saviminermik anaalerisoq. Immaqa toqussapput. Naggataagullu qungujulluni. Sooruna?

Arlaannik peqquteqavissimassaaq! Taamaanngippammi taamaaliorsimanaviannikkaluarpoq. Qeqqarissivunga imminullu anngaaffigalunga. Ingerlaannarli pequliaqqippunga. Unataaneq qaqugu peqquteqalivissinnaagami?

“Taamaanngisaannassaaq,” Johan oqassagaluarpoq. Taamami isumaqaraluarpunga.

Aammaana sooq Mizarukkut ilagigai?

Eqqarsaateqaqalunga matu nakkuppara. Pisinnaasuuguma matu nammineq ammartissagaluarpara Johanilu iserteriarlugu aperalugu parnaarussivik imaluunniit iliveq – sorleq tullinnguullugu orninniarneraa.

Mizarukkunnit takuneqarnissaq pinaveersaarlugu qanorsuaq iliuuseqartarnikuuvugut. Ajoqusernaveersaavillugit. Sulerisut ilisimasaqarniarnata. Johanili nueriasaarpoq ilagalugit. Ruujorimik saviminermik tigumiarluni qungujulallunilu.

Sooruna taamaaliortoq? Qularinngilara peqquteqavissimassasoq, sunaasinnaanersorli eqqoriarsinnaanngivippara. Sooruna aamma taakku orninnagit uanga oqaloqatigisimannngikkaanga?

Paasisaqanngikkaanni pitsaaneruvoq.

Ilisimasaqarpallaalereerpungali. Nalunngilara Johan ujarneqartoq. Nalunngilara inupiloqatigiinnut ilaasortannngorsimasooq. Nalunngilara kisimiilerlunga.

Ilassaqanngilanga.

Inimi uteqattaarpunga.

Nalunngisaqaraanni oqaatiginninnissaq ajornanngippallaalertarpoq. Parnaarussaatsilluni, imaluunniit ilivermukartitsilluni.

Mobilima oqimaassusersua aatsaat malugilerpara. Artungajaavippara.

Politiinut sianeruma oqaatillisunnngussaanga. Johanimut sianeruma nalunngisaqarpallaartutut paasineqassaanga.

Iliusissaarutiivippunga. Pisinnaasuuguma qipittorsinnarlunga siniliinnarusukkaluarpunga. Suut tamaasa puorlugit sinillunga.

Parnaarussivik iliverluunniit. Oqaatiginningeq kapineqarnerluunniit. Susinnaangilanga. Ilami aamma iliuuseqarsinnaangilanga. Tassami Johaniuppat ...

Sapinngisarali tamaat takusaqarnaveersaareernikuuvunga. Tusagaqarnaveersaareernikuuvunga. Maannali oqaaseqartariaqalerpunga.

Artorsangaarlunga mobilera kivippara. Tuugassat eqqortut toortarniarsaraakka. Mobilera siutinnut kivillugu.

“Tuut...” nippappoq.



## ATUARAKET 2019

Naqinnera siulleq

©Alinea aamma Oxfam IBIS

ISBN: 978-87-585-1195-5

Alexander Bach, Dorthe Nielsen aamma

Rebecca Bach oqaaseqaateqarsimanerannut

kukkunersiornerannullu qutsavigaagut.

AtuaRaket 2019-ip imarisai Oxfam IBISip Alineallu

akisussaaffigaat taamaallitullu tunisisut

aningaasaliisullu isumaannik takutitsisuunatik.

LæseRaket 2019 Red Barnet suleqatigalugu

Alinealu tapersersortigalugu saqqummer-

sinneqarpoq.

### Aaqqissuisoq

Line Agerlin Trolle

### Assit

Andreas Beck, Bertil Suadicani, Line Ellen Krabek,

Line Agerlin Trolle, Louise Dyring Mbae, Minzayar

OoPanos, Nesma Ainsour aamma William Vest-

Lillesøe.

Saqqaaani asseq: Heidi Brehm

### Oqaluttualiatut allatat

Atuakkiortut: Sandra Schwartz,

Daniel Zimakoff aamma Kit A. Rasmussen

Titartaasut: Jens Koudahl, Peter Snejbjerg

aamma Inge Rand.

### Ilusaata aaqqissuunna

Peter Waldorph

### Kalaallisunngortitsisoq

Kathrine Knudsen

### Kalaallisuuani kukkunersiortoq

Sófiárák Tobiassen

### Naqinneqarfia

Specialtrykkeriet Arco A/S

### Nassiussuisoq

Ilinniartitaanermut Aqutsisoqarfik

Postboks 1610

3900 Nuuk

ATUAKKAMI ATUAKKIORTUT  
TITARTAASULLU PILLUGIT PAASI-  
SAQARNERUSINNAAVUTIT UANI  
heleverdeniskole.dk/  
tegnere-og-forfattere-2019



THALIANA



ELKIN



JENNIFER



JULIAN



## UKIOQ MANNA ATUARAKET IP AMERIKAMI KUJALLERMIITTUMUT COLOMBIALIAQATIGISSAVAATIT

Colombiami assigiinngissuseq annertoqaaq. Nuna portusuunik qaqqaqarpoq, paneqisumik inoqajuitsoqarluni, kiattup orpippassuaqarluni illoqarfissuaqarlunilu. Pisuut piitsullu naligiinneqaat. Ukiut 50-it sinnerlugit innuttaasut imminnut sorsuunnikuupput, eqqissinissamilli isumaqatigiissut neriummik pilersitsivoq.

AtuaRaketimi ilaatigut Jennifer naggueqatigiinnit wayuuneersoq tusagaqarfigissavat. Sakkutuujusimasut najugaqarfianni Keiler anaananilu najugaqarput, arnaa pikitsitsisuni FARC-imi sakkutuujunikuuvoq. Colombiami illoqarfiit pingaarnersaanni Lucia illumi parnaarsimasi pinnguarpoq. Aamma Amazonasip kuussuatigut Thaliana umiatsiartoq aamma Elkin allatulaaq takorluugalik takusinnaavat.

AtuaRaketimiipputtaaq titartakkat kusanartut oqaluttuallu nutaat qallunaat titartaasartuisa atuakkiortuisalu ilinnut suliarisimasaat. Pissanganarput, nuannerlutik eqqarsarnarlutillu.

Nunarsuarmi siuttuusut nunarsuarmioqatigiit anguniagaat 17-it isumaqatigiissutiginiuuvaat. Anguniakkat sisamaata imarai meeqqat tamarmik pitsaasumik ilinniagaqarsinnaanermut piginnaatitaaffeqarnerat. Suli meeqqat 61 millionit atuartuunngillat. AtuaRaket paasisassarsiorfigineratigut meeqqat tamarmik pitsaasumik ilinniagaqarnissamik piginnaatitaaffeqarnerannut ukkaseqataatitsivutit.

AtuaRaket 2019 atorluariuk.